

KOPONA MWASI NA LIBALA



Babéli bazali ebelé. Nakoki kosunga bango nyonso na mbala moko te. Kasi, bóyoka.

² Nazali solo na esengo ya kozala awa lisusu, na mpokwa oyo, na auditoire kitoko oyo, kati na etonga ya bato kitoko oyo. Pe tozalaki kokóta kuna, kala mingi te, bato bazalaki kuna na balabala bazalaki koloba ete bakokaki kokota te. Pe nalobaki: “Ee, ntango mosusu nakoki kozuela bino mwa esika moko.” Kasi bakokaki kotika bango bákota te. Boye nasengi bolimbisi na ndenge tozali na esika ya kokoka te mpo na bango. Balobaki ete nse na yango ezalaki pe bongo. Pe boye tozali pe na mawa na ntina na yango. Kasi tozali na esengo ya kozala awa, ná esengo ya komona batei malamu nyonso oyo, bato na mombongo awa, pe bino nyonso boyei kouta na bitúka ndenge na ndenge ya ekólo.

³ Nazuaki litómba monene na ntongo oyo, ya koteya na ntongo oyo, na ntango ya bilei ya ntongo, oyo nasepelaka solo mpenza kopesamela lokumu ya koloba liboso na bato malamu ya boye. Motó ya liteya na ngai ezalaki: *Mposo Ekosangolama Elongo Ná Lisango Te*. Nazuaki makoki ya kosilisa yango te. Pe ezalaki libunga ya—ya ndeko te. Amekaki kosenga nzela na moyangeli-esika mpo na kobakisela biso mwa ntango, kasi ye alingaki kosala yango te. Nasepeli solo na yango, Ndeko Demos. Ezali mpenza, mpenza malamu. Natondi bino solo mpenza mpo na boboto na bino, moko na moko na bino. Kasi balingaki kotika biso tosala yango te. Na bongo, esengelaki—esengelaki bobele tósukisa. Nakozongela yango, na ntango mosusu, mpo na kosilisa yango: *Mposo Ekosangolama Elongo Na Lisango Te*. Bososolaki yango, bino baoyo bozalaki awa? [Losambo balobi: “Amen.”—N.D.E.] Nakolikia ete ezalaki na mwa moke oyo ekokaki mpenza kososolama.

⁴ Sikawa, nayebi na mpokwa oyo, molulu moko ekosalema, lisusu, boye nalingi kolekisela bino ntango mingi awa te mpo bózanga yango te. Mpamba te, nakanisi ete ezalaki mpenza na litómba mpo na—mpo na bandimi ya lingomba Pentecotiste, molulu oyo tomonaki na mpokwa wana. Etonga moko ya bato malamu mpenza, biyano malamu mpenza, pe sémba. Esalaki ngai malamu mpenza, komona yango. Natii motema ete Nzambe akopambola yango, na mpokwa oyo. Pe bato nyonso bakotala, tika ete bándima. Wana nde libondeli na ngai na bosembo.

⁵ Pe matatoli mingi eyei, lelo, na nzela ya mikanda pe telefone, mingi mpenza bazali kobikisama na liyangani oyo. Nazalaki mpenza na esengo mpo na yango. Mpo, yango nde, kosunga babeli, yango nde mosala na ngai mpenza.

⁶ Na—namataka awa mpo na koteya. Ngai, boyebi, nazali motei te. Kasi ngai, ná grammair na ngai ya Kentucky oyo, “his, hain’t” pe—pe maloba nyonso wana, boye na—nakoki koloba te ete nazali oyo tobengaka lelo motei ya mikolo oyo. Na—nakoki kozua esika wana te, mpamba te na—natángá te.

⁷ Kasi nasepelaka mpenza kotalisa oyo nayebi na ntina na Yango, epai na bato mosusu, to oyo namiyokaka ete nayebi na ntina na Yango, epai na bato mosusu, lolenge nayekolaki Yango, lolenge oyo Ye azali mpo na ngai. Azali bomoi na ngai mobimba, oyo nyonso ngai nakokaki koluka kozala, pe koleka mpenza nyonso oyo nakotikaláká kokanisa, ete nazaláká mpenza na moninga te, na mokili, ntango nazalaki mwa elenge mobali. Kasi nazopesa mpenza matondi mpo na baninga malamau lelo.

⁸ Nazali. . . [Ndeko mobali moko alobi: “Mwa kokoso ezali kuna na sima mpo na koyoka yo, Ndeko Branham. Púsana pembeni.”—N.D.E.] Oh, bólimbisa ngai. Alobi ete na—nazali mpenza koloba mosika na micro.

⁹ Sikawa, mpo na kokóta mbala moko na liteya, tótanga mwa ndambo ya Likomi. Na—nasepelaka ntango nyonso kotángá Biblia, mpamba te Yango ezali Liloba na Nzambe. Nandimaka yango. Pe nandimaka ete Yango ezali Liloba na Nzambe oyo ekweyaka te. Pe sikawa, nazali na mwa Makomi oyo ekomami awa, pe mwa nkomá mosusu oyo nakolobela yango, mpo na ngonga moke, ntango mosusu mpo na miníti ntuku minei na mitano.

¹⁰ Na sima tokobima na ntango malamau mpo na kokende kotala lisusu molulu malamau oyo na mpokwa oyo. Pe natii motema ete Nzambe akokoba kopambola bino kino na suka. Nayebi oyo esengeli na bino kosala. Esengeli na ngai kokende naino na Tucson, na mótuca, na mpokwa oyo, bomoni, boye bóbanza yango. Wana ezali mobembo ya ngonga zomi, na motuka.

¹¹ Nakokende mobembo mikili mosusu, pe nasengeli kozua mangwele na ngai ya fievre jaune, na ntongo, na biró ya letá. Boye, na—nasengeli kokende kuna. Napusaki yango sima, mokolo mosusu wana, pe bakolinga te óloba “te” lokola eyano sasaipi lisusu. Pe nasengeli lisusu kozwa mángwele ya tetanos ná typhus, pe nyonso mosusu oyo etikali.

¹² Na bongo, nazongisi matondi mingi mpo na libaku malamau oyo, pe—pe mayangani malamau oyo tosalaki liboso na likita yango. Na ntembe te, esepelisaki mpenza motema na ngai. Bozali etónga moko ya bato malamau mpenza. Natii motema ete Nzambe akopambola bino.

¹³ Ntango ngonga ya motuya eko. . . Elima monene wana, oyo azali kuna, oyo auti kobaluka na mpongi, kuna na Alaska, eleki mwa mikolo, atelemisaki lisusu mokila na ye na ntongo oyo, elongo pene na, zingazinga na Washington. Akoki koya ngambo

oyo, na pete nyonso. Pe soki Molimo Mosantu ayebisi ngai polele mpenza . . .

14 Moto moko ayanolaki . . . atunaki ngai boye: “Ekosalema awa, Ndeko Branham?” Te, nayebi oyo wana te. Nayebi eloko moko te, kino náyeba mpenza. Ezali solo.

15 Nalingaka ntango nyonso kozala sembo ná bino. Nakobanza-banza kaka te, kozua makanisi moko boye, to mwa bongo, oyo ngai nandimaka, to eloko moko ya ndenge wana. Na ntango nakoyebisa bino, ekosalema. Ee, Ye asengeli koyebisa ngai, liboso, na sima nde nakoyebisa bino. Na—nayebi ete mokili mobimba ezali koningana. Tokomi na ntango ya suka. Kasi eloko moko oyo namekaka kozala . . .

16 Na ntongo oyo, Ndeko Shakarian azalaki koloba, ndenge ye azaláká koleka na milongo ya mabondeli, kokita kuna pe kozua ba-kálati yango pe na kotala yango, liboso bato bāmata na etumbelo, mpo ma koyeba soki—soki nazalaki koyebisa bango makambo oyo bakomaki kuna. Bato bakomaka makambo ndenge na ndenge na ba-kálati na bango ya mabondeli, boyebi, pe azalaki bobele kolinga komona soki ezalaki ya solo. Alobaki, na ba-kálati nkama likolo na nkama oyo asilaki kotala, ata moko te etikala kozala lokuta. [Ndeko Shakarian alobi: “Ata moko te.”—N.D.E.] Ata moko te ekozaláká lokuta, bomoni, mpamba te, na—na ntango nyonso ezali Nzambe. Soki ngai moko namikotisi na likamgo yango, na ntango wana ekomi lokuta mpo na kobanda.

17 Elenge mwana mwasi moko, tata na ye afandi awa, azali koyoka ngai sikawa, ayaki epai na ngai, kala mingi te. Alótaki ndoto. Alobaki: “Ndeko Branham, ndoto yango elakisi nini?”

18 Nalobaki: “Nayebi te, ndeko mwasi. Nasengeli koluka koyeba soki Nkolo akoyebisa ngai.” Na bongo, nakendeke pe namekaki kotuna Nkolo, kasi Alobelaki ngai eloko te.

19 Mwana mwasi moke yango azongaki lisusu. Alobaki: “Ee, sikawa wapi ndimbola ya ndoto na ngai?”

20 Nalobaki: “Yaka awa, chérie, fándá naino.” Nalobaki: “Tata ná mama na yo bazali baninga na ngai ya malamú mpenza. Omoni? Bauti mosika, na Canada, sima na kozua pension, mpo na kozala awa elongo na ngai. Bandimaka oyo, likambo oyo nazali komeka koloba. Pe natikálá koloba likambo moko te ya lokuta na moto moko te, na mokáno na ngai, na bomoi na ngai. Soki na . . . Nakanisi ete nayebi eloko nini ndoto yango elingi koloba. Kasi soki ngai moko namoni ndoto yango te, pe na sima soki Ye ayebisi ngai ndimbola na yango te, nakoki koyebisa yo te. Omoni, soki namekoli kaka likambo moko, ekoki kozala na ntango moko oyo okosengela na ngai, mpo na likambo ya bomoi to kufa, na ntango wana okoyeba te soki osengeli kondimela ngai to te.”

21 Soki nayebisi bino likambo moko na Nkombo na Nkolo, ezali mpenza yango. Ezali Ye nde ayebisaki ngai yango. Pe kino lelo, na mibu nyonso oyo, na mokili mobimba, pe zinga-zinga na mokili, Etikálá kobima lokuta ata mbala moko te. Mpamba te. . . Pe, boye, boyebi ete moto ya mokili akoki kozanga kokweya te. Esengeli bobele Molimo ya Nzambe mpo na kosala yango.

22 Sikawa, nazali na Nsango oyo nazali na mokumba na yango. Pe mbala mingi, kati na bato, bazuaka ngai lokola, ee, ntango mosusu moto moko oyo azuaki ntango te ya kofanda pe kokanisa mwa moke, ete nazalaki mo—mo, oh, moto moko mabe, ete nalingaka bato te, pe nazalaka ntango nyonso kozokisa bato. Kasi ezali bongo te. Ezali bongo te. Nalingaka bato. Kasi, boyebi, bolingo esembolaka.

23 Soki mwana na yo moke ya mobali afandi na kati ya balabala kuna libanda, pe olobi: “Junior, cheri, nalingi te ete ófanda kuna libanda, kasi. . .” Pe mituka ezali koleka mbangu pembeni na ye, pe okotisi ye na ndako. Azongi lisusu mbangu libanda. Ee, osengeli kosembola ye. Soki olingaka ye, okosala yango. Osengeli.

24 Soki omoni moto azali kotiólá na ebale na bwato moko ya moke, kokende na ngámbo ya bwéta, wana oyebi ete bwato yango ekozinda ntango ekokóma na bwéta, okoloba nde: “Yoane, yo, ntango mosusu osengeli kokanisa mwa moke, ntango mosusu okolóngá na yo te”? Soki nayebi ete akolóngá te, nakobimisa ye na bwato yango, ata na makasi, soki nakokoka, mpo bolingo nde esalaka bongo.

25 Pe sikawa, kati na Mateya oyo nateyaka, namekaka ata moke te kokotisa malakisi, to eloko mosusu. Na—nasalaka yango na losambo na ngai moko. Kasi awa, katikati na mibali ná basi baoyo bazali na ba—denomination ndenge na ndenge pe makanisi ndenge na ndenge, namekaka bobele kolimbola makambo na lolenge ya mwa kolembisa; kasi ékoka kokóma na esika oyo ete bobótáma na Molimo ya Nzambe, nandimi ete bokososola eloko nalingi koloba, kati na mibali Baklisto, ba—Methodiste, ba—Batiste, ba—Presbiterien, pe nyonso mosusu.

26 Sikawa, na mpokwa oyo, nalingi kozua Genese, mokapo ya 24. Nalingi kotánga mo. . . kobanda na molongo ya 12 ya mokapo ya 24 ya Genese.

Pe alobaki, E YAWÉ Nzambe. . . nkolo na ngai Abraham, nabondeli yo, sala ete yango ésalema liboso na ngai lelo oyo pe monisela nkolo na ngai Abraham motema boboto.

Tala, natelemi awa pene na liziba ya mai, pe bana basi ya bato ya engumba bazali kobima mpo na kotóka mai:

Tika ete moseka oyo nakoloba na ye ete, Kitisa mbeki na yo, mpo námela, pe oyo akoloba ete, Melá, pe nakomelisa bakaméla na yo, tika ete ázala mwasi oyo

oponi mpo na mosali na yo Yisaka; bongo nakoyeba ete omonisi boboto epai na ngai. . . epai na nkolo na ngai.

27 Na sima, na Buku ya Emoniseli. Wana ezali oyo ya liboso na Biblia, Genese. Sikawa, na oyo ya suka ya Biblia, nalingi kotánga na mokapo ya 21 ya Emoniseli, pe molongo ya 9.

28 Toyebi likambo Likomi oyo ya Genese elobeli awa. . . Bótanga mokapo yango mobimba, soki bokosepela. Nzambe nde azali kotinda Eliezer. To, Abraham atindaki Eliezer, bólimbisa ngai, koponela Yisaka mwasi na libala. Pe Rebeka kitoko oyo abimaki, pe ezalaki eyano ebongi be ya libondeli oyo—oyo Eliezer, mosali ya Abraham, autaki kobondela.

Sikawa, na molongo ya 9 ya mokapo ya 21 ya Emoniseli.

Pe moko na banje nsambo oyo bazalaki na mbeki nsambo oyo etondaki na malози nsambo ya suka ayaki, pe asololaki na ngai, pe alobaki, Yaka awa, pe nakolakisa yo mwasi na libala, mwasi ya Mwana Mpate.

29 Sikawa nalingi kozua motó ya liteya, na mpokwa oyo, mpo na yango: *Kopona Mwasi Na Libala*. Pe oyo ezali, soki ndeko na ngai oyo azali kosala bande awa alingi, oyo ezali bande oyo bokoki kokende liboso pe kobimisa yango.

30 Sikawa, na likambo oyo, elingi mpenza koloba te ete nazali koloba likambo oyo na losambo oyo awa, kasi ba-bande oyo ekendeke na mokili mobimba. Elimbolamaka, mpenza, oh, na nkóta ebele mpenza, ekómaka kino na bikólo ya bapakano na mokili mobimba. Totindaka ba-bande yango, ofelé, na nzela ya lisanga moko ya losambo. Pe balimbolaka yango. Pe ba-bande yango, ekendeke kino na ba-zamba monene ya Afrika, na Inde, pe bisika nyonso na mokili.

Sikawa, kopona Mwasi na libala!

31 Na makambo mingi ya bomoi, topésamaka makoki ya kopona. Lolenge ya bomoi, yango moko, ezali kopona. Tozali na makoki ya kosala lolenge na biso moko, kopona lolenge na biso moko oyo tolingi kobika.

32 Koyekola kelasi ezali kopona. Tokoki kopona soki tolingi koyekola, to soki tolingi koyekola te. Wana ezali kopona moko oyo tozali na yango.

33 Malamu ná mabe, ezali kopona. Mobali nyonso, mwasi nyonso, elenge mobali pe elenge mwasi, asengeli kopona soki bakolinga kobika malamuru to kobika malamuru te. Ezali kopona.

Kopona ezali likambo moko monene.

34 Esukeli na yo ya Seko ezali kopona. Pe ntango mosusu, na mpokwa oyo, bamosusu kati na bino bokopona esika wana—wana oyo bokolekisa Seko na Seko, liboso liyangani oyo ésila na mpokwa oyo. Ekozala na ntango moko, oyo, soki oboyaki Nzambe mbala ebele, ekozala na ntango moko oyo okoboya

Ye mbala ya suka. Ndelo moko ezali, katikati na mawa ná kosambisama. Pe ezali likambo ya nsómo mpo na mobali to mwasi, elenge mobali to elenge mwasi, kokatisa ndelo yango, mpo kozonga sima ezali te soki okatisi ndelo yango. Na bongo, na mpokwa oyo, ekoki kozala ngonga oyo mingi bakozua—bakozua mokano na bango, esika nini bakolekisa Seko-na-Seko oyo ezangi suka.

³⁵ Tozali pe na kopona mosusu oyo tozalaka na yango na bomoi na biso, ezali, mozalani ya bomoi. Elenge mobali to elenge mwasi, oyo abandi kobika bomoi, a—apesameli makoki ya kopona. Elenge mobali akopona. Elenge mwasi azali na makoki ya kondima to koboya yango. Kasi ata bongo, ezali kaka kopona, na ngámbo nyonso mibale. Mobali pe mwasi, bango nyonso mibale bazali na makoki ya kopona.

Ozali pe na kopona moko, lokola Moklisto.

³⁶ Awa na Amerika, tééé lelo, ozali na makoki ya kopona lingomba oyo olingi kosambela. Wana ezali litómba na yo ya American, kopona lingomba oyo olingi kozala moko na yango. Wana ezali kopona. Okoki pe kokende na moko na yango te, soki olingi na yo te. Kasi soki olingi kolongwa Metodiste pe kokóma Batiste, to kolongwa Katoliko pe kokóma Protestant, pe bongo na bongo, moto moko te akoki koloba na yo to kotinda yo kokóta na lingomba moko boye. Yango—yango ezali bonsomi na biso. Yango nde democrasia na biso. Moto nyonso akoki kopona mpo na ye moko. Bonsomi ya losambo, pe ezali li—likambo ya motuya. Tika éte Nzambe ásungá biso tókoka kobatela yango ntango molai mpenza

³⁷ Ozali pe na kopona moko. Soki. . .Ntango oponi lingomba oyo, okoki kopona soki yo, na lingomba oyo, soki okopona lingomba oyo ekokamba yo esika ya Seko-na-Seko na yo. Okoki kopona lingomba oyo ezali na endimeli moko boye, ete ntango mosusu okanisi ete endimeli yango ezali oyo olingi. To, lingomba mosusu ezali pe na endimeli na yango.

³⁸ Na sima, ezali pe na Liloba na Nzambe, oyo okoki kopona. Osengeli kopona.

Katikati na biso, ezali na mobeko moko oyo ekomami te, ya kopona.

³⁹ Nakanisi ezalaki Eliya, mokolo moko, likolo na Ngomba Carmel, sima na botalisi momékano ya suka, na ntango ya matata mpenza, oyo tolingi kokóma na yango sikawa. Ntango mosusu, ekoki kozala ngai to yo, na mpokwa oyo, ete tókoka kopona, lokola likambo esalemaki na Ngomba Carmel. Na bosolo nionso, nakanisi ete ezali kosalema sikawa, na mokili mobimba. Kasi ekozala na ntango moko kala mingi te, oyo ekosengela na yo kopona.

⁴⁰ Pe bino, mibali oyo bozali awa, bato ya mangomba ya denomination na bino, bóndima likambo oyo, ete ntango ekoya

mpo na bino, ntango oyo bokosengela kopona. To bokokóta na Likita ya Mokili, to bokozala lisusu denomination te. Ekosengela na bino kosala yango, pe kopona wana ezali koya kala mingi te.

⁴¹ Pe kozela kino ngonga ya suka ezali mpenza likámá, pe, mpo okoki kokangama na eloko moko oyo okokoka lisusu kokabwana na yango ata moke te. Boyebi, ezali na ntango moko oyo bakoki kokebisa yo, na sima, soki okatisi ndelo wana ya likebisi, na ntango wana, osili kotiáma elembo na ngámbo mosusu, otiami elembo.

⁴² Bómikanisela, ntango mobu ya yubilé ezalaki kokoma, pe nga—nganganzambe azalaki koyúla keleló na ye likolo na mpunda, ete moómbo nyonso akoki kokóma nsomi. Kasi soki baboyaki kondima bonsomi na bango, na boye asengelaki komemama na tempelo, na likonzi moko, pe bazalaki kotobola ye litoi na motongá, na bongo asengelaki kosalela nkolo na ye ntango nionso. Bazalaki kotia ye yango na litoi lokola etaliseli ya koyoka. “Kondima eutaka na koyoka.” Ayokaki keleló yango, kasi aboyaki koyokela yango.

⁴³ Pe mbala mingi, mibali ná basi bayokaka Solo ya Nzambe, pe bamonaka Yango kotatolama pe kotalisama polele, Solo, kasi ata bongo, baboyaka koyoka Yango. Bamilóngisaka na lolenge moko to mosusu. Baponaka eloko mosusu, oyo bazali na yango, esika ya kondima Solo pe makambo polele, yango wana matoi na bango ekoki kokangama na Nsango-malamu. Bakoyoka Yango lisusu ata moke te. Toli na ngai mpo na bino, ezali ete soki Nzambe alobi na motema na yo, sálá yango mbala moko.

⁴⁴ Eliya apesaki bango makoki ya kopona oyo esengelaki na bango: “Bópona lelo oyo nani oyo bokosalela. Soki Nzambe azali Nzambe, bósalela Ye. Kasi soki Baala azali Nzambe, bósalela ye.”

⁴⁵ Sikawa, ndenge tozomona, makambo nyonso ya mokili etalisaka makambo ya molimo, ndenge toyekolaki na liteya na biso ya ntongo oyo, lokola mói ná lolenge na yango. Yango nde ezalaki Biblia na ngai ya liboso. Liboso nátánga lokasa moko na Biblia, nayebaki Nzambe. Mpamba te, Biblia ekomami bisika nyonso na lizalisami, pe yango elongobani mpenza na Liloba na Nzambe: ndenge kufa, kokundama, lisekwa ya lizalisami; pe ndenge moi ebimaka, elekaka, eláláka, ekufaka, esekwaka. Ezali na makambo mingi mpenza oyo tokoki kotalisa na elilingi, Nzambe kati na lizalisami, kasi tosengeli kotia yango pembeni, mpo na Liteya oyo.

⁴⁶ Sikawa, soki makambo ya molimo, to, makambo ya mosuni ezali etaliseli ya makambo ya molimo, na bongo, kopona mwasi na libala, na mosuni, ezali etaliseli ya kopona Mwasi na libala, Mwasi na libala, na molimo.

⁴⁷ Sikawa, ezali likambo mpenza ya eyóngi, ntango tolingaka kopona mwasi, mobali, mpamba te ba-ndayi yango awa ezali

“kino liwa ekokabola biso.” Ndenge wana nde tosengeli kobátela yango. Pe bolapaka ndayi yango liboso na Nzambe, ete bobele liwa nde ekokabola bino. Nakanisi ete tosengeli . . . Mobali oyo azali kokanisa malamumu, oyo azali kobongisa bolamu ekoya ya bomoi na ye, asengeli kopona mwasi yango na bokebi nyonso mpenza. Bókéba mpenza na likambo bozali kosala. Pe mwasi oyo azali kopona mobali, to azali kondima kopona ya mobali moko, asengeli kokéba makasi mpenza na likambo azali kosala, pe koleka mingi na mikolo oyo. Mobali asengeli kokanisa pe kobondela liboso ápona mwasi.

⁴⁸ Nakanisi ete, lelo, ntina mpenza oyo mabala mingi ezali kokufa sikawa, ete biso, na Amerika, tozali kokamba mokili mobimba, na makambo ya koboma libala. Tozali kokamba mokili mobimba. Mabala ezali kokufa mingi awa, na ekólo oyo, koleka bisika nyonso mosusu, pe tosengélaki kozala pe tomónanaka lokola ekólo ya Baklisto. Oyo mpamela monene, ba-tribunal na biso ya koboma mabala! Nakanisi, ntina na yango ezali mpo mibali batángwe mosika na Nzambe, basi pe batángwe mosika na Nzambe.

⁴⁹ Tomoni ete, soki mobali abondelaki pe mwasi abondelaki mpo na likambo yango; kotala kaka miso ya kitoko, to mapeka yango ya mbinga te, to eloko moko ya ndenge wana, to likambo mosusu ya mposa ya mokili; kasi soki bataleli liboso Nzambe, pe balobi: “Nzambe, oyo ezali mwango na Yo?”

⁵⁰ Nabanzi ete lelo, niamu-niamu ezali mingi, kaka lokola na eteyelo. Ntango—ntango bana balekaka na ndako na ngai, na ntongo moko boye, bana mingi ya bazalani, wana—wana baninga na ngai, balekaka pe balobaka: “Ndeko Branham, okoki kobondela mpo na biso? Tozali na—na momekano ya kelasi lelo. Na—natángi butu mobimba, kasi nandimi te ete nakoki—nakoki kozua. Bóndela mpo na ngai.” Nakanisi ete mwana nyonso ya kelasi, soki olingi, soki . . . Elongo ná baboti na mésa na ntongo, bokoki koloba: “Mama, Yoane azali na momekano ya kelasi lelo. Tóbondela mpo na ye sikawa.” Nakanisi ete ekoleka makambo nyonso oyo bokoki kosala na ndenge mosusu, to kobwaka miso na lokasa ya moninga mpo na ko-tricher, nakanisi, soki bokoki bobele koya pe kobondela na ntina na likambo yango.

⁵¹ Pe soki tokoyekola likambo oyo tozosala na ntango tolingi kobala, ntango toponaka mwasi na biso, mobali na biso, soki tokoki koyekola yango malamumu! Mobali asengeli kobondela na etingia nyonso, mpo akoki kobebisa bomoi na ye mobimba. Bóbosana te, ndayi yango ezalaka “kino liwa ekokabola biso”, pe akoki kobebisa bomoi na ye soki aponi mabe. Kasi soki ayebi ete, azali kopona malamumu te pe azali kobala mwasi oyo alóngóbani te mpo na kozala mwasi na ye, pe ata bongo, asali yango, boye wana ezali mbeba na ye. Soki yo mwasi azui mobali moko pe ayebi ete alóngóbani te mpo na kozala mobali na yo, boye wana ezali mbeba na yo moko, sima na yo koyeba nini ezali malamumu

pe mabe. Boye, osengeli kosala yango te kino óbondela mpenza na etingia nyonso kino suka.

⁵² Ezali pe motindo moko mpo na kopona losambo. Sikawa, osengeli kobondela mpo na losambo oyo ozali kosangana na yango. Bóbosana te, ba-losambo ezalaka na molimo.

⁵³ Sikawa, nalingi kotonga moto te. Kasi namoni ete nakómi mokóló, pe moko na mikolo oyo, nasengeli kokende. Pe na Mokolo ya Kosambisama nasengeli koyanola, mpo na makambo oyo nazoloba na mpokwa oyo to na ntango mosusu nyonso. Pe yango wana, esengeli na ngai kosala makambo na eyongi nyonso pe kondimisama solo mpenza.

⁵⁴ Kasi, kende na losambo moko, pe soki otali malamau bizaleli ya losambo yango, tala kaka malamau mokengeli mwa moke, mbala mingi okomona ete losambo esalaka makambo lokola mokengeli yango. Mbala mosusu, namitunaka soki tozuaka milimo moko na mosusu te, na esika ya Molimo Mosantu. Soki okei esika oyo mokengeli azalaka mpenza na bompikiliki pe akobaka bongo, okomona ete losambo ezalaka motindo moko. Nakoki komema bino na losambo moko oyo namonaka mokengeli kotelema, koningisa motó liboso pe sima. Soki otali losambo malamau, basalaka likambo yango moko. Zuá mokengeli oyo andimaka makambo nyonso, mbala mingi losambo yango pe ekosala likambo ndenge moko. Boye, soki nazalaki kopona losambo moko, nalingaki kopona losambo moko ya moboko, ya solosolo, ya Plein Evangile, oyo ya Biblia soki nazalaki kopona moko mpo na komema libota na ngai. Poná. Natalaki . . .

⁵⁵ Mokolo moko, bana mibali yango, mwana ya Ndeko Shakarian ná bokiló na ye bamemaki ngai awa mpo na kobondela mpo na elenge mobali moko, moyembi, elenge mobali kitoko. Nautaki kozonga . . . Fred Barker, nde nkombo na ye, nautaki kozonga na mobembo. Babengaki ngai pe ete “Fred azali kobunda na liwa”. Na sima, liboso nákokoka kokota na ndako yango, nsango mosusu eyaki: “Ntango mosusu asili kokufa na ngonga oyo.” Alobaki ete asalaki he—hemorrhage na bongó, pe akómaki paralizé, pe—pe azalaki kobunda na liwa, pe mwasi na ye alingaki nábondela mpo na ye mobali.

⁵⁶ Namilobelaki: “Oh, soki nameki kozua mpépo, akokufa liboso nákóma kuna, pe ntango mosusu asili kokufa na ngonga oyo.” Boye, nabengaki nokinoki pe nazuaki elenge mwasi yango na telephone. Pe—pe tozalaki koloba na litói ya Fred na nzela ya telephone. Azalaki kokoka komela eloko te. Bakómaki koleisa ye na nzela ya sónde. Pe ntango tobondelaki mpo na ye, alobaki, na nzela ya kosala bilembo, ete bálóngola yango na mongongo na ye. Akokáki komela eloko. Minganga bandimaki yango te. Balongolaki yango, pe akokáki komela eloko. Mokolo mosusu wana, akomaki kofanda.

Lingomba; kopona lingomba.

⁵⁷ Kala mingi te, bauti kobenga ngai na telephone. Na ntongo ya lelo, mondimi moko na losambo na ngai, oyo azali mpenza Batiste ya mwasi, ya Louisville, akufaki lelo na ntongo-ntongo. Pe losambo na ngai na engumba, etóna moko ya bato oyo bamibulisá, basanganaki elongo bango na bango pe bakendeki kuna, liboso bápakola malasi ebembe na ye, batelemaki zingazinga na ye, babondelaki kino bomoi ezongaki kati na ye. Pe azali na bomoi na mpokwa oyo. Ba-mpaka ya losambo na ngai, ee, bateyámá kondima ete nyonso ekoki kosalema, babélémaki na Nzambe na bosembo.

Boye, osengeli kopona malamú.

⁵⁸ Lisusu, lolenge ya mwasi oyo mobali akozona, ekotalisa bamposa pe ezaleli na ye. Soki mobali aponi mwasi ya mabe, etalisaka ezaleli na ye. Pe eloko oyo amikangi na yango, ezali kotalisa mpenza eloko nini ezali kati na ye. Mwasi atalisaka eloko nini ezali kati na mobali na ntango ye mobali aponi ye lokola mwasi. Etalisaka eloko nini mpenza ezali kati na ye. Etali te eloko nini ye azoloba na libanda, bótala oyo ye abali.

⁵⁹ Soki nakei na biró ya moto moko, pe ye alobi ete azali Moklisto; ná bililingi ndenge na ndenge na bitutú yango, mizíki ya boogie-woogie wana ezali kobeta. Nazali na ntina ya oyo ye azoloba te. Nakondima litatoli na ye te, mpo molimo na ye ezali koleisama na makambo wana ya mokili. Bongo soki abali mwasi oyo abinaka na bar, to soki abali mwasi ya pité, to ricketta moko ya kitoko ya mikolo oyo? Ezali kotalisa polele. Ezali kolakisa eloko nini azali na yango kati na makanisi na ye, ya oyo libota na ye ekozala, mpamba te azuaki ye mpo na kobokolo bana na ye. Pe oyo nyonso ye azali, lolenge wana nde akobokolo bana yango. Na boye, yango ezali kotalisa eloko nini ezali kati na mobali yango. Mobali oyo azui mwasi ya ndenge wana, azali kotalisa bobele oyo ye azali kokanisa mpo na mibu-ekoya-sima.

⁶⁰ Bokoki kokanisa Moklisto kosaláká likambo ya ndenge wana? Te, misie. Ngai nakoki te. Moklisto ya solosolo akoluka basi ya bonzénga ndenge wana te, baoyo babínaka na bar, pe basi-ya-pité. Akoluka ezaleli ya Moklisto.

⁶¹ Sikawa, okoki kozala na makambo nyonso te. Ekoki kozala na mwana mwasi moko oyo azali kitoko mpenza. Pe mwana mwasi mosusu, ntango mosusu azali na ye. . . lolenge na ye ekoki kozala malamú koleka oyo mosusu. Pe osengeli ntango mosusu kotika moko mpo na mosusu, kasi, soki azali na lolenge ya mwasi mpenza te, ya mwasi te. Pe, ye. . . Ázala kitoko to te, etali ngai te. Ekozala malamú koleka ótala ezaleli na ye, ázala kitoko to kitoko te.

⁶² Sikawa, mpamba te, esengami ete soki Moklisto alingi kopona mwasi, asengeli kopona mwasi ya solosolo, oyo abótámá mbala mibale, etali te lolenge oyo ye azali komonana. Ezali nde oyo ye azali, yango nde ékosala ye. Na sima, lisusu, ezali kotalisa

polele ezaleli ya bulee na ye moko, pe ezali kotalisa eloko nini ezali na kati ya makanisi na ye pe likambo nini ekosalema na mikolo-ekoya-sima, mpo libota na ye ekobókolama na mwasi ya ndenge wana, na ntina na miango mikoya-sima mpo na ndako na ye.

63 Soki abali mwa moko na ba-ricketta ya mikolo oyo, basi ya pité, akozela kozua eloko nini? Libota ya ndenge nini mobali akoki kozela kozala na yango? Soki abali mwana mwasi oyo azangi mpenza bomoto ya kotikala na ndako pe kotala makambo ya ndako, kasi alingaka nde kosala mosala libanda, na biró ya moto moko, akozala mama-mobateli-ndako ya ndenge nini? Bokozua nde bana-ya-kokengela bana pe nyonso wana. Ya solo.

64 Sikawa, nasepelaka mpenza na lolenge ya makambo ya mikolo oyo te, ya basi basalaka. Ntango namónaka basi oyo balátaka ba-uniforme, kotambola-tambola na engumba oyo na ba-motó, lokola polisi, ezali nsoni mpo na engumba nyonso oyo ekopesa nzela na mwasi kosala yango. Bomoni? Bomoni? Na ntango oyo mibali mingi bazangi mosala, yango ezali kotalisa lolenge ya kokanisa ya mikolo oyo na engumba na biso. Yango ezotalisa bobebisami. Tosengami kozala na basi yango kuna libanda ndenge wana te. Bazali na likambo ya kosala kuna libanda te, ndenge wana.

65 Ntango Nzambe apesaki mobali mwasi, Apesaki ye eloko ya malamú koleka oyo Akokaki kopesa ye, libanda na lobiko. Kasi na ntango mwasi abandí koluka kozua esika ya mobali, na ntango wana akomi eloko ya mabe koleka oyo mobali akoki kozala na yango. Wana ezali solo. Bomoni?

Sasaipi tokoki komona etamboleli na yango na molimo.

66 Na—nayebi ete ezali mabe, bokanisi ete ezali mabe, kasi ezali Solo. Etali biso te soki ezali mabe ndenge nini, tosengeli kotala likambo yango ndenge ezali. Yango nde oyo Biblia elakisaka. Bomoni?

67 Sikawa, tomoni awa polele mwango ya molimo, mwango ya Nzambe mpo na Efandelo na Ye ya mikolo-mikoya elongo na Mwasi na Ye ya libala ya mikolo-mikoya, emonani polele sikawa.

68 Soki mobali abali mwasi-ya-pité, bomoni eloko nini ye azali koluka mpo na mikolo-mikoya. Soki mobali abali mwasi oyo alingaka kofanda na ndako te, bomoni eloko nini azali koluka mpo na mikolo-mikoya. Mokolo moko ngai. . .

69 Likambo oyo ékoyokana somo. Nayoki mposa ya kolobela yango. Pe na—na, mbala mingi, soki nayoki mposa ya koloba likambo, esengeli náloba likambo yango. Pe mbala mingi, ezalaka lolenge ya Nzambe.

70 Na—nazaláká na momesano ya kokende elongo na mobókoli bibwéle moko, nazaláká kosala elongo na ye, mpo na kosomba ba-ngombe. Pe namonaki ete mobangé ya moto yango azalaki

ntango nyonso kotala elenge ya ngombe-mwasi na miso liboso ándima kokakola yango. Na sima, azalaki kobalola motó na yango, pe kotala-tala yango. Ngai nazalaki kolanda ye, kotala ye malamumu. Azalaki kotala-tala yango na likolo pe na nse, soki ezalaki malamumu, lolenge na yango. Na sima, azalaki kobaluka pe kotala yango na miso, pe mbala mosusu azalaki koningisa motó pe koleka na ye.

Nalobaki: “Jeff, nalingi kotuna yo likambo moko.”

alobaki: “Lobá, Bill.”

⁷¹ Nalobaki: “Mpo na nini ozotala ntango nyonso ngombe yango na miso?” Nalobaki: “Ezomonana ngombe kitoko, malamumu—malamumu pe monene.”

⁷² Alobaki: “Tika náyebisa yo boye, mwana mobali, ozali na makambo mingi ya koyekola.” Pe na—nasosolaki yango ntango ayebisaki ngai. Alobaki: “Etali ngai te ndenge nini ye azali, . Ata ezali na misuni kino na litíndí. Kasi soki ezali na miso wana ya nkanza, komeka kosomba yango ata moke te.”

Nalobaki: “Mpo na nini bongo, Jeff?”

⁷³ “Ee,” alobaki, “Eloko ya liboso,” alobaki, “akobanda kofanda esika moko te.” Pe alobaki: “Ya mibale, akotikaláká kozala mama mpo na bana na ye te.” Pe alobaki: “Sikawa, batiaki ye kati na lopángo, yango wana akómi monene. Soki okangoli ye, ná kotala ya nkanza wana, akopota mbangu kino liwa.”

⁷⁴ Nalobaki: “Oyebi, namoni lokola nayekoli likambo moko. Nandimi ete ezali pe bongo mpo na basi.” Ya solo. Ya solo.

⁷⁵ Kotala wana ya nkanza, ya nsomo, ya ricketta, ekozala malamumu kozala mosika na ye, mwana, ná bipakola-pakola nyonso ya langi ya bleu oyo amitieli na miso na ye. Pe nalingaki te. . . nakolingaka yango te. Nandimi te ete yango ebongi na Moklisto. Etali ngai te boni ba-televizió pe ba-zulunále elobi ete ezali kitoko. Ezali eloko ya nsomo pe mabe koleka nyonso oyo namóná na bomoi na ngai.

⁷⁶ Ntango namonaki yango mbala ya liboso, awa na Cafeteria Clifton, na ntongo moko, na ntango ya bilei-ya-ntongo. . . Namonaki bilenge basi yango koya. Ndeko Arganbright autaki kokóma, ngai pe. Autaki kokita na nse. Namonaki elenge mwasi moko kokota. Namilobelaki: “Ee, na—na—na—nayebe te.” Namóná yango naino liboso te. Ezalaki ndenge mosusu. Oh, ezalaki lokola azalaki ya kopola, boyebi, azalaki mpenza nsomo na kotala. Nazali koloba yango te mpo na kosekisa. Na—nazali koloba yango. Boyebi, nasila komóná maladi ya mabá. Nazali ntóma. Nasila komóná lolenge nyonso ya nsomo, boyebi, ya ndenge bokono ezalaka. Pe nalingaki kokende epai ya elenge mwasi yango pe koyebisa ye: “Na—na—nazali motei. Na—nabondelaka mpo na babeli. Oko—okolinga ete nábondela

mpo na yo?” Namóná naino eloko ya ndenge wana te. Na sima, mibale to misato mosusu bakotaki. Na bongo, nazongaki mwa moke sima pe nazelaki.

⁷⁷ Ndeko Arganbright ayaki, bongo, nalobaki: “Ndeko Arganbright?” Akoki kozala awa. Nalobaki: “Likambo nini ekómeli mwasi wana?” Bomoni?

Alobaki: “Wana, wana ezali kopakola-pakola.”

⁷⁸ Nalobaki: “Ee, oh! la la! la la!” Bomoni? Namilobelaki ete basengelaki komema ye esika moko na ndako ya bato ya bokono ya mába, boyebi, mpo na kopekisa été eloko yango ekómela basi mosusu nyonso.

⁷⁹ Kasi, boyebi, osengeli kolengela makambo, kotala, kobondela, ntango ozali kopona. Mpo, tomoni, na likambo oyo, Liloba ya elaka. Ye, mwasi na libala oyo mobali akopona, akotalisa polele ezaleli ya ye mobali. Akotalisa polele eloko nini ezali kati na ye.

⁸⁰ Sikawa, bokoki kokanisa mobali oyo atondisami na Molimo Mosantu, kozua eloko ya ndenge wana lokola mwasi na ye? [Losambo balobi: “Te.”—N.D.E.] Na—na—nazomona yango te, ndeko. Sikawa, ntango mosusu ngai nazali na ngai mpenza mobangé. Kasi, boyebi, na—nakoki mpenza kososola yango te, bomoni, botala, mpo ekotalisa polele eloko nini ezali kati na ye. Ye mwasi nde akosunga ye mpo na kotonga libota na ye na mikolo-mikoya.

⁸¹ Sikawa, na boye, soki tozóngi sikawa mwa moke na ngámbo ya molimo. Ntango omoni lingomba moko oyo ezali na mokili, kosala makambo lokola mokili, kosepela na mokili, kosangana na mokili, kozua Mibeko ya Nzambe lokola Ye nde akomá Yango te, na bongo, bo—bokoki kososola ete Klisto akozua Mwasi na libala ya ndenge wana te. Bokoki kokanisa, kozua lelo lingomba ya mikolo oyo lokola Mwasi na libala? Nkolo na ngai te. Ngai te. . . Nákomona yango na mwa mpasi. Te. Sikawa, bóbosana te, mobali ná mwasi na ye bazali moko. Okosangana elongo ná moto ya ndenge wana? Soki osali yango, ekolembisa mpenza kondima na ngai mpo na yo.

⁸² Na bongo, bongo soki Nzambe Ye moko asangani na eloko ya ndenge wana, mwasi ya ndumba mpenza ya denomination? Bokanisi ete Akosala yango, “Bazali na lolenge ya kosambela nde bazali koangana nguya na yango”? Akosala yango ata moke te. Mwasi asengeli kozala na ezaleli ya Ye kati na ye. Lingomba ya solosolo, oyo ebotami mpenza mbala ya mibale, esengeli kozala na e—ezaleli oyo ezalaki kati na Klisto, mpo mobali ná mwasi bazali moko. Soki Yesu asalaki bobele makambo oyo esepelisaki Nzambe, kobatela Liloba na Ye pe kotalisa Liloba na Ye polele, Mwasi na Ye ya libala akosengela kozala na lolenge moko ya ezaleli yango. Akoki ata moke te kozala denomination. Mpamba te, na bongo, ata olingi koloba “te,” ndenge nini, ye

akonzami na likita moko esika moko boye, oyo eyebisaka ye nini kosala pe nini akoki kosala te, pe, mbala mingi, ezalaka na bamilió na kilometele mosika na Liloba ya solo.

⁸³ Ezali mpenza mawa ndenge tokendá mpenza mosika na Mokambi ya solo, oyo Nzambe atíkélá biso mpo na kokamba Lingomba. Atindá bakengeli-bakonzi ya etúka ata moke te. Atindá ata moke te ba-episkopo, ba-cardinal, ba-sángó, ba-pápa. Atindá nde Molimo Mosantu mpo na Lingomba, mpo na kokamba Lingomba. “Ntango Ye Molimo Mosantu akoya, Ye akokamba bino na Solo nyonso, akomonisela bino makambo oyo Nayebisaki bino, akozongisela bino yango na makanisi, pe akolakisa bino makambo masengeli koya.” Molimo Mosantu asengelaki kosala yango. Sikawa, lingomba ya mikolo oyo eyinaka Yango. Balingaka Yango te, bongo, ndenge nini akoki kozala Mwasi na libala ya Klisto? Bato ya lelo bazali kopona denomination ya mikolo oyo. Makambo yango esalaka, etalisaka bobele lisosoli mabe na bango ya Liloba.

⁸⁴ Nazali na mposa ya kosala bino mpasi te, kasi nalingi kotika yango kokóta na bozindo mpenza kino bókoka komona yango.

⁸⁵ Nabálísá balongani mingi, kasi ekaniselaka ngai ntango nyonso Klisto ná Mwasi na Ye ya libala. Moko na mabála nasíla kobalisa awa, kala mingi te, e—ezalaki likambo moko ya kokamwisa na bomoi na ngai. Esili koleka mibu mingi, ntango nazalaki naino elenge motei.

⁸⁶ Ndeko na ngai ya mobali azalaki kosala na—na Misala ya Kotonga ya Letá. Nayebi te soki moto moko azali lisusu koyeba yango lisusu, to te, moto moko ya mpaka lokola ngai. Ezalaki mwa—mwango moko bokulaka azalaki na yango. Pe ndeko na ngai azalaki kosala kuna, pene na kilometele ntuku minei na mwambe. Bazalaki kotímola ba-láki, ezalaki mwango ya kobatela bozalisi.

⁸⁷ Pe ezalaki na mwana mobali moko kuna oyo azalaki kosala, elongo na ye, autaki na Indianapolis, pene na kilometre, oh, nkama moko na ntuku motoba likolo na ngambo ya Jeffersonville, esika na—nafandaka, to nazalaki kofanda. Pe ezalaki na . . . Mokolo moko, alobaki na ndeko na ngai, alobaki: “Doc,” alobaki, “na—nalingi . . . Nalingi kobala, soki nakoki kozua mbongo ya kokoka mpo na kofuta motei.” Alobaki: “Na—nazali na mbongo ya kokoka kofuta mokanda—ya-letá, kasi”, alobaki, “nazali na mbongo ya kokoka te mpo na kofuta motei.”

⁸⁸ Doc alobaki: “Ee, ndeko na ngai azali motei, pe—pe ye—ye akoki kobalisa yo.” Alobaki: “Afutisaka bato mbongo ata moke te mpo na makambo ya ndenge wana.”

Alobaki: “Okoki kotuna ye soki akoki kobalisa ngai?”

⁸⁹ Ee, na mpokwa wana ndeko na ngai atunaki ngai. Nalobaki: “Soki atikálá kobala naino te liboso, moko to mosusu na bango mibale, pe bango . . . makambo nyonso ezali malamú.”

Alobaki: “Ee, iyo, nakotuna ye.”

Pe nalobaki: “Soki ezali bongo, yebisa ye, baya.”

⁹⁰ Na bongo, ntango mokolo ya poso ekomaki, elenge mobali yango ayaki. Ezalaka ntango nyonso likambo monene mpo na ngai, ntango nakanisaka likambo yango. Ngai. . . Ezalaki sima ya nzanga, mbula ezalaki kobeta, Chevrolet moko ya kala, mínda ya liboso bakangá yango na nsinga ya bibendé, eyaki kotelema liboso na ndako. Elekaki kaka mwa ntango moke, sima na liwa ya mwasi na ngai, nazalaki kobíka lokola monzemba, na mwa ndako ya biteni mibale. Pe—pe Doc azalaki wana elongo na ngai, kozela bango.

⁹¹ Pe—pe elenge mobali moko abimaki na motuka, pe azalaki mpenza lokola mobali ya libala te, mpo na ngai, to mpo na moto nyonso, nabanzi. Iyo. Nakokaki kosomba sapato ya mwa malamú, na dollar moko ná ndambo. Ye alataki sapato moko, esilá kobeba. Pe pantalon na ye ezalaki mpenza ya mulàlà. Pe alataki moko na ba-kazaka oyo ya kala ya velours ya coton. Nayebi te soki bato bakóli kati na bino bakoki koyeba yango lisusu. Ezalaki lokola elekisamaki na masíni ya kosukola bilamba kasi batelisaki yango te, ezalaki na ba-nzela-nzela, ekangámá *boye*, nsóngé *étéléma*.

⁹² Pe e—elenge mwasi moko abimaki na ngámbo mosusu, alataki mwa, oh, mwa robe moko ya karé-karé.

⁹³ Nayebi te. Mokolo moko nasalaki libunga ya koloba nkombo ya bilamba ya ndenge wana. Vichy, nabanzi ebéngamaka bongo. Na *boye*, ezalaki. . . [Losambo baseki—N.D.E.] Nalobi yango lisusu mabe. Na—nasalaka likambo yango ntango nyonso. Pe nalobaki. . .

⁹⁴ Abimaki na motuka, pe bamatáki na bibuteli. Pe—pe ntango bakotaki, mwa mwana mwasi ya bato yango, ye. . . Nabanzi ete ye, alataki eloko mosusu te, bobele jupe. Azalaki ata na sapato mpenza te. Asengaki nzela na motuka pe bamemaki ye ofelé longwa na Indianapolis. Azalaki na mwa suki ekitá na sima, akangisaki suki ya milai pe ekitá na mokongo na ye. Azalaki komonana elenge mpenza.

Nalobaki na ye: “Ozali na mibu ekoki mpo na kobála?”

⁹⁵ Alobaki: “Iyo, misie.” Pe alobaki: “Nazali na ndingisa ya kokomama kouta na tata ná mama na ngai.” Alobaki: “Nasengelaki kolakisa yango awa na—na tribunal, mpo na kozua certificat na ngai.”

⁹⁶ Nalobaki: “Malamu.” Nalobaki: “Nakosepela kosolola na bino mwa moke, liboso ya kosála milúlú ya libala oyo.” Bafandaki. Elenge mobali yango azalaki kotálatala na ndako mobimba; azalaki mpenza na bosenga ya kokatama suki. Akobaki kotalatala na ndako mobimba. Azalaki koyoka ngai te. Nalobaki: “Mwana, nalingi ete óyoka makambo nazali koloba.”

Alobaki: “Iyo, misie.”

Pe nalobaki: “Olingi elenge mwana mwasi oyo?”

Alobaki: “Iyo, misie. Nalingi ye.”

Nalobaki: “Bongo yo, olingi ye?”

“Iyo, misie. Nalingi ye.”

⁹⁷ Nalobaki: “Sikawa, ozali na esika ya komema ye sima na bino kobálana?”

Alobaki: “Iyo, misie.”

⁹⁸ Nalobaki: “Malamu. Sikawa,” nalobaki, “nalingi kotuna yo likambo moko. Soki nasosoli malamumu, osalaka awa, na Misala ya Kotonga ya Letá.”

Alobaki: “Iyo, misie.” Ezalaki pene na dollar zomi na mibale na mpóso moko.

Nalobaki: “Okanisi ete okoki kokokisa ba-bosenga na ye?”

Alobaki: “Nakosala nyonso nakoki kosala.”

⁹⁹ Nalobaki: “Ee, ezali malamumu.” Pe nalobaki: “Sikawa, bongo soki alongolami na . . . Bongo soki balongoli ye na mosala oyo, ndeko mwasi? Okosala nini, okozonga mbangu na ndako, epai ya mama ná papa?”

Alobaki: “Te, misie. Nakotikala elongo na ye.”

¹⁰⁰ Pe nalobaki: “Bongo yo, misie, soki bobóti bana misato to minei, eloko moko te ya koleisa bango, pe ozali na mosala te. Okosala nini, okobengana ye?”

¹⁰¹ Alobaki: “Te, misie. Nakokoba kobunda. Tokolukaluka na ndenge nyonso.”

¹⁰² Namimonaki moke. Namonaki ete alingaki mpenza mwasi yango, pe balinganaki. Nabalisaki bango.

¹⁰³ Na sima, namitunaki esika nini amemaki ye. Sima na mwa mikolo, natunaki ndeko na ngai, Doc, esika yango. Alobaki: “Kitá na New Albany”, engumba moko ya moke na nse na biso.

¹⁰⁴ Kuna na ebale, esika nazalaki na mwa ndako ya linzanza, esika nazalaki kokende mikolo nyonso, ntango na—ntango nazalaki na mosala ya kotia pe kobongisa makonzi ya nsinga ya lótiliki. Boye ntango baninga mosusu ya mosala, bango nyonso bazalaki kofanda zingazinga, kobeta masolo ya maseki pe nyonso wana, ngai nazalaki komata na motuka pe kokende mbangu na ebale mpo na kobondela na ntango yango, na kati kuna, pe kotánga Biblia na ngai, na nse ya eteni moko monene ya linzanza, esika kompani ya kosala bibende ezaláká. Ezalaka na ebélé ya ba-wagon ya kala kuna.

¹⁰⁵ Elenge mobali oyo akendeke kuna, azuaki wagon moko kuna pe amisalelaki ekuke. Azuaki nkasa ya zulunále ná ba-bouton-punaise.

106 Bato boni bayebi bouton-punaise? Boye, moto moko te ya Kentucky azali awa. Ezali, soki ozui eteni ya carton, otúbí yango bouton-punaise, mwa nsete moko. Na sima finá yango kati na . . . Yango nde bouton-punaise.

107 Na bongo, batiaki yango bisika nyonso. Pe akende ki kuna na kompani ya bibende pe amizuelaki mwa biloko, pe asalaki ebuteli mpo na komata. Azuaki mwa ba-sandúku ya kala, pe asalaki mesa. Mokolo moko, namilobelaki: “Nakokende kotala ndenge nini bazali kokóba elongo.”

108 Pene na sanza motoba liboso na yango, nabalisaki mwana mwasi ya E. V. Knight ná mwana-mobali ya E. T. Slider. E. V. Knight, moko na bato ya mosolo mingi koleka, na Ebale ya Ohio, pe, oh, azali mokonzi na ba-kompani minene kuna, oyo etongaka ba-ndako esilá kosalema, pe bongo na bongo. Pe—pe Slider, E. T. Slider, ye, ezali kompani ya zelo ná mabanga ya mikemike, bana ya ba-millionaire. Pe nabalisaki bango.

109 Nakende ki na esika moko, toyekolaki ndenge tokosala, pene na mposo mibale mobimba, kokota na mwa ndako moko ya moke mpenza pe kofukama likolo na coussin. Milúlú ya ndenge nyonso pe makambo nyonso mpenza esengalaki nátósa, nasengelaki kotósa yango, mpo na kobalisa ba-bálani wana! Pe ntango babimaki, ee, bazalaki . . . Mwa ba-bálani mosusu mibale oyo bazalaki bobele kuna, na mwa chambre moko ya kala, esika tozalaki na mwa kanapé ná mbeto oyo egúmbamaka, kasi mabála nyonso mibale esalemaki na milúlú ya motindo moko.

110 Na bongo, mokolo moko, nakanisaki kokende kotala balóngani oyo ya bazui. Bazalaki na ntina ya kosala mosala te, ba-tata na bango bazalaki ba-millionaire, batongelaki bango ndako ya kitoko. Na bosolo nyonso, moto oyo E. V. Knight, kuna likolo ya ngomba, bisímbeli-bikuke ya ndako na ye ya monene esálémá na ba-kará zomi na minei, boye, bokoki kokanisa lolenge nini ya ndako oyo bazali kofanda na yango. Bazalaki na ntina ya kosala mosala te. Bazalaki kopesa bango motuka ya Cadillac ya kitoko mibu nyonso. Bazalaki bana ya likinda, pe bazalaki na biloko nyonso balingaki. Mokolo moko, ntango nabélémaki . . .

111 Sikawa, ndenge nayebanaki na bango, moko na baninga na bango azalaki moninga na ngai moko ya malamumu. Bisó nyonso tokomaki lokola baninga. Pe nayebanaki na bango ndenge wana, ntango balingaki ete ngai nábalisa bango.

112 Na bongo, nakende ki kotala bango. Nabimaki na Ford na ngai ya kala, libanda, pe namátaki bibuteli. Pe—pe namátaki, napusanaki mwa mingi mpenza, pe nayokaki bango. Bazalaki mpenza koswana. Bazalaki kosálelana zúwa. Bautaki na esika moko ya mabína. Azalaki elenge mwasi moko ya kitoko mpenza. Azalaki mwa moke lokola moko na bana-basi oyo ya miss ya bonzénga. Alóngaki ba-mbano mingi kuna, pe azuaki mituka

ná biloko mosusu, mpo abimaki miss ya basi kitoko. Nazalaki kotala bango, moko afandaki na litúmu moko pe mosusu na ngámbo mosusu, pe bazalaki koswana mpo na elenge mobali oyo abínaki ná ye, to elenge mwasi moko, likambo moko ya ndenge wana.

¹¹³ Ntango nabélémaki, batelemaki mbala moko pe basimbanaki noki noki na ma—maboko, na ngambo kuna, pe bapusanaki pene na ekuke. Balobaki: “Ee, mbote, Ndeko Branham! Ozali malamumu?”

Nalobaki: “Malamu. Bongo bino, bozali malamumu?”

¹¹⁴ Pe, “Oh,” mobali alobaki, “na—na . . . Tozali na esengo mingi. Boye te, cherie?”

Pe mwasi alobaki: “Iyo, cheri.” Bomoni?

¹¹⁵ Sikawa, bomoni, bozali komilatisa eloko oyo ezali sóló te. Sikawa, bayétolaka móto na móto ya koyema te, lokola mangomba mosusu oyo ezoluka koyema pantekote, na likambo oyo esálémá eleki mibu nkóto to mibu nkóto mibale. Bayétolaka móto na móto ya koyema te. Pantekote ezali mpenza likambo ya sóló lelo lokola ezáláká eleko wana. Bomoni? Iyo. Móto ezali kokoba kokita. Ezali móto ya koyema te. Ezali Móto ya sóló.

¹¹⁶ Boye, bango, bazalaki wana. Bomoni? Na—nakolinga kobika bongo te.

¹¹⁷ “Oh,” namilobelaki, “oyebi, kuna na nse, na ngámbo ya lobwaku, na ngambo ya ebale, kuna nde esika ba-bálani mosusu oyo bazali kofanda.” Namilobelaki: “Mokolo moko ya mpóso sima na nzanga, nakokende kuna mpo na kotala ndenge bazalaki kokóba elongo.”

¹¹⁸ Na bongo, ná elongi na ngai bosoto, nalataki salopette ya bosoto, ná bisalelo na ngai. Namilobelaki: “Nakobimela bango, na ndenge ya kobombana” Nabélémaki na ndenge ya komibomba, nasalaki lokola nazalaki kotala-tala ba-isolateur oyo ebebisamaki na mikalikali to eloko ya ndenge wana, wana nazalaki kotambola kolanda singa ya telephone, ba-singa ya lótiliki pembeni na ebale. Pe tala Chevrolet wana ya kala ezalaki liboso ya ndako na bango. Esilaki koleka pene na mobu moko, sima na ngai kobalisa bango. Pe ezalaki na—na . . . Ekuke ezalaki polele, pe nakokaki koyoka bango kosolola. Boye likambo oyo ekoyokana lokola moto ya bilongi mibale, kasi nabélémaki pene mpenza mpo na koyoka, komona likambo nini bazalaki koloba. Natélémaki wana. Nalingaka mpenza koyeba likambo na ngai moko.

¹¹⁹ Nalingaka komona pe kondimisama ete nayebi likambo nazali koloba. Nasalaka bongo mpo na Liloba na Nzambe. Ezali Solo, to Ezali Solo te? Akobatela Liloba na Ye, to Akobatela Liloba na Ye te? Soki Abateli Liloba na Ye te, na boye Azali

Nzambe te. Bomoni? Soki Akokisi Liloba na Ye, Azali Nzambe. Bomoni?

¹²⁰ Na bongo, nalingaki komona ndenge nini bango bazalaki. Napusanaki na mayele pembeni mpenza. Nayokaki ye mobali koloba: “Oh, cherie, nalingaki kosombela yo yango, mpenza.”

¹²¹ Ye mwasi alobaki: “Sikawa, tala, molongani.” Alobaki: “Elamba oyo ezali na yango malamau.” Alobaki: “Ee, oyo ezali na ya yango kitoko.” Alobaki: “Nasepeli na yango. Kasi, omoni. . .”

¹²² Napusanaki na mayele lisusu, mpo nákoka kotala na nzela ya lidusu, esika ekuke ya wagon ezalaki na mwa esika ya kofungwama. Pe ye mobali azalaki ya kofanda wana, pe mwasi afandeli ye na makolo; ná lokobo na ye ezinga mwasi, mwasi pe azingaki ye loboko. Mobali azalaki na ekoti moko ya kala, ekita na pembeni, pe ezalaki na lidusu mwa moke, likolo na yango ya kofinama, pe atiaki lifuti na ye na kati na yango. A—azalaki kotia yango likolo na mésa. Alobaki: “*Oyo* mpo na biloko ya kolia. *Oyo* mpo na assurance. Pe *oyo* mpo na motuka.” Pe bazalaki kokoka kokokisa mbongo mpo na sanza mobimba te. Nayaki kososola ete amonaki robe moko na vitrine, azalaki kotala-tala yango mpóso mibale to misato, ezalaki na motuya ya dollar moko na ndambo. Alingaki kosomba yango. Alobaki: “Ee, cherie, okomonana kitoko mpenza kolata yango.” Pe alobaki. . .

¹²³ Mwasi alobaki: “Kasi, cheri, na—nazali na robe. Na—nazali mpenza na mposa na yango te.” Bomoni? Pe mwa miss wana. . .

¹²⁴ Nazongaki sima, pe natombolaki miso. Namonaki nsó—nsóngé ya likolo ya ndako mosusu wana. Natelemaki wana pe natalaki miniti moke. Namilobelaki: “Nani nde mozui?” Namilobelaki: “Soki, Bill Branham, soki olingi kopona moko na bisika oyo, okokende wapi?” Mpo na ngai, nakopona eloko ya kitoko wana te, kuna likolo na ngomba. Nakopona ezaleli oyo awa na nse, mama-ya-ndako mpenza, moto oyo alingi ngai pe atikali elongo na ngai, moto oyo azali koluka kotonga libota; ézala te moto oyo akosilisa yo mbongo na makambo ya ndenge na ndenge; kasi moto oyo azali elongo na yo, eteni na yo.

¹²⁵ Likambo yango etikala na ngai, ndenge yango esalemaki. Moko aponaki mwasi kitoko, mosusu aponaki ezaleli. Sikawa, yango nde lolenge bobele moko oyo bokoki kopona. Liboso, luká ezaleli, bongo na sima, soki olingi ye, malamau.

¹²⁶ Bótala, Adama ya liboso ya Nzambe azalaki na makoki ya kopona mwasi na ye te. Apesamaki makoki ya kopona te. Nzambe asalelaki ye mwasi moko, pe apesamaki makoki ya kopona ye te. Boye tomoni ete ye mwasi amemaki ye mosika na Liloba na Nzambe. Esengamaki na ye te kobondela na ntina na likambo yango. A—a—azali lokola yo ná ngai te. Apesamaki makoki ya kopona te. Pe lisusu, na kosaláká bongo, ye mwasi alongolaki ye na esika na ye mpenza lokola mwana na Nzambe. Pe asalaki yango na kolakisáká ye lolenge ya kobika koleka

ya mikolo oyo, likambo oyo basengelaki mpenza kosala te. Kasi ezaleli ya ye mwasi etalisaki ete azalaki na libunga. Bamposa na ye pe ba-ntina azalaki kolanda ezalaki mpenza mabe. Andimisaki ye mobali, na mabanzo na ye, ete polé ya sika, ya mikolo wana, oyo autaki komona, oyo ekeseneki na Liloba na Nzambe, nde ezalaki lolenge malamumu koleka ya kobikela.

¹²⁷ Basi boni lelo, ná mibali, lokola epai na epai, oyo bakoki komema basi malamumu mosika na Nzambe, to komema mobali malamumu mosika na Nzambe? na koluka koyebisa ye: “Losambo oyo, bino ba-Pantekotiste, losambo wana,” balobaka, “oh, ezali makambo ya kala, esíla ngala, bóndima yango te.” Malamumu óbondela makasi liboso ya kobala mwasi yango. Ata azali kitoko ndenge nini. Ezali ndenge moko pe ná mobali.

¹²⁸ Ye mwasi andimisaki ye libanda na mokano na Nzambe pe amemaki ye kosala likambo oyo asengelaki kosala te, pe, na yango, ememaki kufa na libota mobimba ya bato. Yango wana Biblia epekisi ye kolakisa, to koteya, to komanyola Liloba na Nzambe na lolenge nyonso

¹²⁹ Nayebi, bandeko basi, mingi kati na bino bolobaka: “Nkolo abéngáki ngai mpo na koteya.”

¹³⁰ Nakowelana na bino te. Kasi nakoyebisa bino ete Liloba elobi ete bosengeli kosala yango te. “Mwasi akoteya te, to akozua bokonzi moko te, kasi áfanda na kimia.”

“Ee,” okoloba, “Nkolo ayebisi ngai ete násala yango.”

¹³¹ Natii ntembe na yango ata moke te. Boyokaki Liteya na ngai mokolo wana na mpokwa, na ntina na Balama? Balama azuaki mokano polele ya liboso ya Nzambe ete: “Kosala yango te.” Kasi akobaki kosala mbílingámbilinga kino sukusuka Nzambe alobaki na ye ete ákende kosala yango.

¹³² Ekoki kosalema ete Nzambe apesi yo ndingisa ya koteya. Nalobi te ete Asalaki yango te. Kasi elongobani na Liloba pe mwango na Ye ya ebandeli te. “Mpo mwasi asengeli kozala na botosi, ndenge mobeko pe elobi.” Ezali solo. Na boye, esengami te na ye kosala yango.

¹³³ Sikawa, bótala lisusu, ndenge mwasi na libala ya mokili azali elilingi ya oyo ya molimo. Liloba elobi, été, “Asalemaki mpo na mobali, kasi mobali asalemaki mpo na ye te.”

¹³⁴ Sikawa, nakolobela Mwasi na libala ya Klisto na mwa baminuti moke, kasi nazali koluka kotalisa bino mobóko na yango.

¹³⁵ “Mwasi asalemaki mpo na mobali, kasi mobali mpo na mwasi te.” Yango nde ntina oyo, na mibeko ya kala, libala ya bondongó elongobanaki na mobeko. Botala Dawidi, azalaki wana ná basi nkama mitano, pe Biblia elobi “Azalaki moto kokokana na motema mpenza ya Nzambe”. Ná basi nkama mitano, pe Solomona ná basi nkóto, kasi ata moko te kati na basi yango akokaki kozala na mobali mosusu.

¹³⁶ Bózua bande na ngai ya *Libala Pe Koboma Libala*. Oyo, kuna likolo na ngomba, na Tucson, kala mingi te awa, nazalaki kobondela mpo na yango kuna na likolo. Babimisaki bana ya kelasi mpo na kotala ndenge Likonzi na Móto yango ezalaki kobaluka-baluka na ngomba pe kozua lolenge ya molongósi, kokende pe kozonga, komata pe kokita. Bato mosusu awa bayebi yango, bazalaki kuna, pe bamonaki Yango; pe Yango. . . ntango wana nde Ayebisaki ngai Solo ya likambo oyo etali libala pe koboma libala. Soki ngámbo moko ekei na ngambo *oyo* boye, pe mosusu ekei na ngambo *wana* boye, Solo esengeli kozala esika moko. Sima na Bilembo Nsambo yango, Atalisaki Solo ya likambo yango.

¹³⁷ Bótala, sikawa, mwasi akokaki kozala bobele na mobali moko, mpamba te “Mwasi asalemaki mpo na mobali, kasi mobali mpo na mwasi te.” Basi nkama mitano nyonso wana bazalaki bobele mwasi ya Dawidi, pe ezalaki elilingi. Ntango Klisto akofanda na Kiti-ya-Bokonzi na Millennium, Mwasi na Ye ya libala akozala bobele moto moko te, kasi ekozala bato zomi nkóto na nkóto, Mwasi na libala, banso kati na Moko. Pe Dawidi azalaki na basi ebele, lokola moko na moko, kasi bobele bango nyonso elongo bazalaki mwasi na ye. Lokola Nzoto mobimba ya bandimi ezali Mwasi na libala ya Klisto, mpamba te Ezali Ye, mwasi. Ye azalaki Mobali. Sikawa, biso tosalelaki mpo na Klisto. Klisto asalemaki mpo na biso te.

¹³⁸ Yango nde oyo biso tolukaka kosala lelo na ba-búku na biso, ezali nde koluka kosala ete Liloba (oyo ezali Klisto) ékokana na lolenge na biso, esika ete biso tóluka komikokanasi na lolenge ya Liloba. Wana nde bokeseni.

¹³⁹ Ntango mobali aponi elenge mwasi kati na libota moko, asengeli kotalela kitoko te, mpo kitoko ekosaka. Pe kitoko, kitoko ya mokili, ya mikolo oyo, ezali ya zabolo.

“Oh,” nayoki moto moko koloba kuna, “keba awa, motei!”

¹⁴⁰ Nalobi ete makambo ya mokili oyo, oyo ebengamaka kitoko, ezali mpenza ya zabolo. Nakotalisa bino yango polele. Na bongo, na polé ya likambo oyo, tika tóluka-luka na Liloba mosantu ya Nzambe, mpo na komona soki ezali solo to te. Pe bamosusu kati na bino basi bolingaka kozala kitoko mingi! Bomoni esika yango euti. Na ebandeli, tomoni ete Satana azalaki kitoko mingi kino apéngwisaki Banje. Pe ye azalaki Mwanje ya kitoko mpenza koleka bango nyonso. Etalisaki ete yango efandi kati na zabolo. Masese elobi, Solomona alobaki: “Kitoko ezali mpamba.” Ezali solo. Lisumu ezali kitoko. Na ntembe te. Ebendaka.

¹⁴¹ Nalingi kotuna bino motuna moko pe koloba na bino likambo moko awa. Nalingi ete bólanda malamú, mwa miníti moke. Kati na bikelamu nyonso na mokili, ba-ndeke, ba-nyama, tomoni ete na bomoi ya ba-nyama, na nyonso, longola bato, mobali nde azalaka kitoko, mwasi te. Mpo na nini bongo? Bótala

na . . . Botala mbuli, oyo ya—ya mobali kitoko pe monene ná maseke na ye, pe oyo ya moke ya mwasi, azángá maseke. Bótala so—soso ya mwasi, mwa soso ya mwasi ya matóno-matóno, ná soso ya mobali monene ná nsála kitoko. Bótala ndeke ya mobali ná ndeke ya mwasi. Bótala libata ya mobali ná ya mwasi. Bomoni? Pe ezali na ekelamu moko te na mokili, oyo esalémá, oyo ekoki kopengwisa pe kobungisa lokumu na yango lokola mwasi.

¹⁴² Sikawa, ndeko mwasi, kotelema te mpo na kobima. Zela kino tóyoka suka ya Likambo oyo. Bomoni? Bomoni?

¹⁴³ Ezali na eloko moko te, nyama ya mwasi moko te, longola bobele mwasi ya moto, oyo ekoki kozala na bondúmbá. Bobengaka mbwa ya mwasi “ndumba”, bobengaka ngulu ya mwasi “mwa—mwasi ya bosoto”, kasi na bomoto, bazali na bomoto mingi koleka ndambo ya ba-vedette ya film oyo bazali awa. Bakoki kozala eloko mosusu te bobele na bomoto.

¹⁴⁴ Pe mwasi azalaki moko oyo nde mbongwana esalemaki epai na ye, mpo na lipéngwa. Ezali solo. Bomoni esika kitoko ememaka ye? Sikawa, yango wana, lelo, tozali komona ete basi bakómi kokoma kitoko mingi. Bózua Pearl Bryan, bosílá komona fotó na ye? Elobámá ete ye azaláká mwasi ya kitoko koleka na Amerika. Ezali na mwana-mwasi ya kelasi ata moko te, ata ya eteyelo nini, oyo azangi te kotika ye na—na sima. Boyebaki ete esengelaki kozala ndenge wana? Boyebaki ete Biblia elobi yango, ete ezali lolenge wana nde yango ekozala?

¹⁴⁵ Boyebi ete, na ebandeli, kokweisama eyaki na nzela ya basi? Pe kokweisama . . . Pe suka ekosukisama lolenge moko, basi bakozala na bokonzi pe bakokonza mibali, pe bongo na bongo. Boyebi ete Makomi elobi yango? [Losambo balobi: “Amen.”—N.D.E.] Boyebi, ezali mokolo oyo mwasi azali kolata bilamba ya mibali, pe azali kokata suki, makambo yango nyonso ekeseni na Liloba na Nzambe. Pe boyebi ete azali etaliseli ya lingomba? [“Iyo.”] Soki botali malamumu makambo oyo basi bazali kosala, bokomona makambo lingomba ezali kosala. Ezali ya solo mpenza. Sikawa, sikawa, ezali mpenza solo, kaka ndenge Liloba na Nzambe ezali solo.

¹⁴⁶ Ekelamu mosusu moko te ya mwasi oyo esalémá, ekoki kokweisa lokumu na yango lokola mwasi. Ata bongo, mpo na yango, lokola asalémá . . .

¹⁴⁷ Mwasi azalaki na kokelama ya ebandeli te. Bikelamu mosusu nyonso ya basi ezalaki na kokelama ya ebandeli: ba-ndeke, ya mobali ná ya mwasi; ba-nyama, ya mobali ná ya mwasi. Kasi epai na bato, Nzambe asalaki bobele mobali, pe Abimisaki nde na kati na ye. Mwasi azali ekelamu euti na mobali, mpo Nzambe abandisaki eloko ya ndenge wana te. Bóluka-luka na Makomi. Ezali mpenza solo. Nzambe, te misie, na kokelama na Ye ya ebandeli. Mwasi atiamaki kuna.

148 Kasi soki akoki komibatela malamumu, azali na lifuti monene koleka mobali. Atiamaki na mabele ya komekama. Kufa eyei na nzela na ye. Ye nde amémá liwa nyonso. Kasi, na sima, Nzambe abalukaki pe asalelaki mwasi moko mpo na kozongisa Bomoi; amemaki Mwana na Ye na nzela ya mwasi, oyo ya botosi. Kasi mwasi oyo ya mabe azali eloko ya—ya mabe koleka; eloko moko te ekoki kokita na nse ndenge wana.

149 Kaina, mwana ya Satana, akanisaki ete Nzambe andimaki kitoko. Akanisaka bongo lelo. Kaina azalaki mwana ya Satana. “Oh, zela naino!”, okoloba. Tokokota na bozindo na yango te, kasi bótika nákata likambo yango mpo na bino. Biblia elobi ete “autaki na oyo mabe.” Boye, wana ekati likambo. Malamu. Sikawa, azalaki mwana ya Satana. Pe akanisaki ete soki atongi etumbelo pe abongisi yango kitoko mpenza mpo na kokumbamela, yango nde eloko oyo Nzambe akomémiá.

150 Bakanisaka, bakanisaka likambo moko lelo. Na ntembe te. Boye: “Tokotonga ndako ya monene. Tokozua bibongiseli ya minene. Tokotonga ndako ya monene koleka pe tokozua bato oyo balataka malamumu koleka, ba-nganganzambe ya mayele koleka.” Mbala mosusu Nzambe azalaka na ba-kilometele milió zomi mosika na yango. Ya solo. Ata bongo, ezali lingomba.

151 Boye, soki Nzambe amémiaka bobele kokumbamela, bosembo, mbeka, Kaina azalaki mpenza moyengebene lokola Abele. Kasi, ezalaki na nzela na emoniseli nde asosolaki ete baboti na ye baliaki mbuma ya póme te.

152 Awa nakoloba likambo moko oyo ekoyokana malamumu te mpo na motei, kasi nakoloba yango, ata bongo. Nayokaka bato mosusu koloba makambo, kobetaka mwa masolo ya kosekisa. Ezali mposa na ngai te. Kasi nalobaki likambo oyo, ata bongo: “Soki kolia mbuma ya póme esalaki ete basi báyebe ete bazalaki bolumbu, ekozala malamumu ete tópesa bango lisusu ba-mbuma ya póme.” Bomoni? Bomoni? Ah-hah. Bólimbisa ngai mpo na yango, kasi ezali bobele mpo na kolembisa moke. Nauti kotia bino motema likolo awa, ntango nazolobela basi, pe bongo na bongo. Na—na—nalingi kokitisa bino motema mwa miniti, mpo na oyo ekolanda. Sikawa, bótala, bino . . . Ezalaki ba-mbuma ya póme te. Toyebi yango.

153 Na mikolo oyo, lingomba, ná makambo yango ezali kosala, ekómi lokola makambo mosusu nyonso oyo moto asálá, lingomba ebandi kokóma na mayele ya nzebi. Bazali koluka kokómisa yango lingomba ya mayele ya nzebi, na kobenda bokebi ya bato na bililingi pe ba-ngonga ya minene na likolo. Ezali mawa mingi komona ba-Pantekotiste komikotisa na potopóto yango. Ekozala kutu malamumu bótelema kuna na litúmu, ná ndúndú, ná Molimo ya Nzambe zonga-zonga na bino. Kasi bozali koluka komikokanisa na bamosusu oyo batikali, mpo bokómi

denomination. Yango nde esalaki yango. Bomoni? Mangomba ezali koluka kokóma na boyebi ya nzebi

¹⁵⁴ Bomikanisela, wana moto azali kokende mosika na mayele ya nzebi, azali komiboma mokolo na mokolo. Ntango asalaki balúti ya bondóki, bótala mbano na yango. Ntango asalaki motuka, yango ebomi bato mingi koleka balúti ya bondóki. Sikawa amisaleli bombe ya hydrogène. Nakomituna soki akosala na yango nini? Ya solo.

¹⁵⁵ Ezali pe ndenge moko na lingomba, ntango azali komeka kosala makambo na nzela ya nzebi, na nzela ya kobakisa makanisi ya bato, yango ezali komema bino mosika na Nzambe, pe na kufa, koleka ndenge ezalaki na ebandeli. Ezali solo. Kopona losambo na yo te ndenge oponaki mwasi na yo. Bomoni? Makambo oyo nzebi esalaki mpo na mwasi, ezalaki likambo monene, kasi na oyo etali losambo na yo, ekozala malamú kozala mosika na yango; amisaleli biloko ya kopakola, ba-poudre, ná makambo mosusu nyonso oyo. Poná kokokana na ezaleli ya Liloba na Ye.

¹⁵⁶ Tókkanisa sikawa mwasi na libala ya nzoto ya lelo ná oyo abengami lingomba-mwasi na libala ya lelo. Bókkanisa mwasi moko, oyo azali komilengela mpo na libala lelo.

¹⁵⁷ Sikawa, bótala naino makambo oyo nzebi esaleli ye mwasi. Ya liboso, akómi kobima ná suki bakátá, kobongisa suki lokola Jacqueline Kennedy, bomoni, to eloko moko ya ndenge wana. Pe boyebi likambo nini Biblia elobi? Biblia epesi ata mobali nzela, soki alingi, ya kolongola ye na libala, na kokabwana na ye, soki ye mwasi asali bongo. “Mwasi oyo akati suki na ye, azali mwasi ya lokumu te.” Biblia elobi bongo. Ya solo. Boyebaki yango te? Hein? Oh, iyo! Nateyaka mingi mpenza na Californie mpo bino bózanga koyeba yango. Ezali solo. Oh, iyo! Ekosunga ngai na nini? Bazali kosala yango, ata bongo. Okoki kozua ngulu te pe ópesa ye nkombo mosusu, mpo ókomisa ye mwana-mpate. Bótala.

¹⁵⁸ Bokoyina ngai sima na likambo oyo, kasi bokoyeba Solo. Bomoni?

¹⁵⁹ Bótala. Tókkanisa yango. Tala ye wana azali koya ná bipakólá-pakola ya ndenge nyonso, akómi eloko oyo azali te, mwasi na libala ya mikolo oyo. Sukolá elongi na ye, okokima ye, ntango mosusu. Akobangisa yo na ndenge ya somo, soki balongoli ye biloko nyonso wana. Ezali pe ndenge moko ná lingomba, ná etutú monene liboso, oyo bapakólá lángi, likindo ya Max Factor mobimba. Ah-hah. Bango mibale bazali na—na elongi kitoko ya lokuta, kitoko esalemi na bato kasi kitoko esalemi na Nzambe te. Ezaleli mpenza ezangi na moko to na mosusu.

¹⁶⁰ Bótala, kaka lokola Satana, ná oyo esengeli mpo na kopengwisa, bókkanisa ye sikawa ná mwasi na libala ya mikolo

oyo: alataka ba-kupé, apakolaka-pakolaka, akataka suki na ye, alataka bilamba oyo emonanaka lokola mibali, pe ayokaka mokengeli oyo ayebisaki ye ete ezali malamu. Azali mopengwisi. Akonyokwama mpo na yango na ngámbo mosusu. Ya solo. Azali kosala yango mpo na kopengwisa, mpo na kozala eloko oyo ye azali te.

¹⁶¹ Yango nde lingomba ezali kosala, kozua ba-Doctorat minene na Likindo, Doctorat ya Philosophie, Doctorat ya Droit. Bongo bokoloba: “Mokengeli na biso azali *oyo* boye, oyo *wana* boye, pe oyo *mosusu* boye,” ntango mosusu ayebi na ntina na Nzambe ata moke te, lokola Hottentot ayebi na ye butú ya Ezipito te. Ezali solo. Ya solo. Kobikela mwa makambo ya likindo kuna, kasi ayebi eloko moko te na oyo etali Nzambe.

¹⁶² Lingomba ya mikolo oyo ná kopakola-pakola na bango ya likindo, hmm, bazali na basi na bango, bango nyonso ná nkembo na bango basila kokókóla, mpo na ricky moko pe mokengeli na bango moko, lokola Yezabele moko boye, soki pe moko yango atikálá kozala. Suki bakátá, ba-kupé, bipákólápakola, nyonso wana babongisi yango na lolenge ya likindo, ndenge wana nde lingomba ekómi. Ezali solo. Kasi ezaleli na ye ya molimo ezali mpenza mosika na oyo ya mama ya ndako oyo Yesu Klisto azali koya kokamata.

¹⁶³ Soki Moklisto abali mwasi ya ndenge wana, etalisi ete asili kolongwa na ngolu. Mposa na ye mpo na Nzambe ná mposa na ye mpo na libota, ya oyo libota esengeli kozala, ezali mosika, ntango aponi mwasi ya ndenge wana. Te misie. Na ntembe te, akoki ata moke te kolóngobana na mposa ya Moklisto. Ezaleli ya molimo na ye ezali na nse koleka, ekúfá, na kitoko ya denomination pe na bilúlá ya mokili.

¹⁶⁴ Yango mpenza nde esika lingomba ekómi lelo, etekeli Satana ezaleli epesamela ye na Liloba, mpo na kozua losambo ya mayele ya nzebi oyo esalémá na moto. Na ntango wana, azalaki na makoki, lokola lingomba ya Nzambe, ya kokangama na Liloba na Nzambe pe kozala na Molimo Mosantu kosala mosala kati na yango, kosangisa Nzoto esika moko ná Liloba pe bolingo na Nzambe. Esika na yango, atekaki makoki na ye ya bokulutu, lokola Esau, pe aponaki denomination, atiki ye ásala yango, nyonso oyo ye alingaki kosala, ya solo, mpo na koyebana ndenge mama na ye asalaki na Nicée, na Roma. Liloba na Nzambe!

¹⁶⁵ Oh, ndenge likambo yango ekoti mpenza kati na etonga ya ba-Pantekotiste na biso! Ezali mpenza mawa, kasi esalemaki bongo.

¹⁶⁶ Bótala malamu, miniti moke, mamélo na lingomba Katoliko. Mwasi yango, mpo na kokóma mamélo, pe kozua ezipelo ya suka wana, asengeli komipesa mpenza mobimba na lingomba yango. Azali (elimo, nzoto pe molimo) libúlá ya lingomba yango. Azali lisusu na makanisi na ye moko te. Akoki kozala na yango te,

ntango azui ezipelo ya suka wana, azali na makanisi na ye moko te, azali na mokano na ye moko te. Bomoni awa ete Satana akómiseli bango lokuta na ye lokola eloko ya solo.

¹⁶⁷ Lingomba ya Klisto ya solo, Mwasi na libala, esengeli komipésá mobimba na Ye ná Liloba elakámá na Ye, kino makanisi mpenza, oyo ezali kati na Klisto, ézala kati na bino. Bokeseni ezali mpenza!

¹⁶⁸ Pe lelo, tozali komona ete lingomba ya mikolo oyo, lingomba ya mokili ya mikolo oyo, lingomba ya mokili ya mikolo oyo ná Lingomba ya molimo, yango nyonso mibale ezali na zemi, mpo na kobota bana mibali.

¹⁶⁹ Moko na bango, na mbotama ya denomination, akobota moko na . . . mikolo, na . . . mikolo oyo, na Likita ya Mangomba ya Mokili mobimba, oyo ekobimisa motemeli-na-Klisto na mokili, na nzela ya denomination. Ezali mpenza Solo. Ntango mosusu nakozala na bomoi te mpo na komona yango. Nandimi ete nakomona. Kasi, bino bilenge, bómikanisela ete boyokaki motei moko koloba likambo yango. Sukasuka ekokokisama. Pe yango nde elembo na nyama, ntango akosala Likita ya Mangomba ya Mokili mobimba yango. Pe akobota mwana na ye ya mobali, motemeli-na-Klisto.

¹⁷⁰ Mosusu akumbi zemi na nzela ya Liloba na Nzambe pe akobota Nzoto, Nzoto ya Yesu Klisto oyo esili kotongama, yango ezali Mwasi na libala. Nzoto ya Klisto esili naino kotongama te. Bato boni bayebi yango? Mobali ná mwasi bazali moko. Pe Klisto azali Nzoto moko, Liloba. Mwasi na libala asengeli kozala eteni etikali ya Nzoto yango. Pe bango mibale, elongo, basali Nzoto moko lisusu. Lokola Adama azalaki na ebandeli: mobali ná mwasi na ye bazali moko. Sikawa, Ye, Mwasi na libala ya solo, amipésá mpenza mobimba na Ye, na lolenge ete Asálelaka likanisi na Ye moko te. Likanisi na Ye, na ntembe te, ezali mokano na Ye, pe mokano na Ye ezali Liloba na Ye.

¹⁷¹ Sikawa bótala mwasi na libala ya maloba, oyo aponami na moto, pe bókokanisa oyo ya molimo ná oyo ya nzoto, ya lelo, Yezabele ya mikolo oyo, alokami na Akaba na ye, biloko kitoko ya Max Factor pe nyonso wana. Bótala lingomba, ndenge moko, kasi, mpo na Liloba ya Nzambe na bomoi, azali mwasi ya ndumba; ba-denomination minene, ba-ndako minene, mbongo mingi, lifúti monene, bamipésá mobimba. Mibali batelemaka na eteyelo bazali kondima ete ezali mabe te, pe bazali kokanga miso na likambo yango. Kopengwisama mpenza, eloko mosusu te. Ezali ya solo ete Eleko ya lingomba Laodikia ekufi miso, ndenge mpenza Biblia elobelaki yango. “Olobi: ‘Nazali mozui. Nafandi lokola mwasi-mokonzi. Nazali na bosenga ya eloko moko te.’ Kasi oyebi te ete ozali mobóla, moto na mawa, mokufi miso, moto na bolozu, bolumbu: kasi oyebi yango te.” Soki ezali YANGO ELOBI NKOLO ya Emoniseli 3 te, boye, natángá Yango

mokolo moko te. Yango nde oyo azali, kasi ayebi yango te! Bókanisa naino.

172 Soki oyeibisi mobali to mwasi moko, na balabala, oyo azali mpenza bolumbu, pe oyeibisi ye ete azali bolumbu, kasi bakoloba: “Ezali likambo na yo te”, ee, bongó na bango ezali kosala malamumu te esika moko boye. Eloko moko na makanisi na bango ezali kotambola malamumu te.

173 Pe, na ntango okoki kotánga Liloba na Nzambe, ndenge oyo bato basengeli kosala, pe libatizi ya Molimo Mosantu oyo tozali na yango lelo, kasi, bato, ee, bakotala yo lokola obeli liboma. Soki olobi na bango: “Bosengeli . . .” Basengeli kobotama mbala mibale. Basengeli kondima Biblia.

174 Balobaka: “Ezali masapo ya Bayuda, ya mibu eleká. Lingomba na biso ezali na nzela.” Bato na bolozizi, bato na mawa, bakufi miso, bolumbu, kasi bayebi ata yango te. Ezali mpenza . . . Pe Biblia elobaki ete nde lolenge oyo bango bakómi na yango.

Ndenge nini mosakoli ya solo akoki kozanga komona yango? Nayebi te.

175 Ezali kokota moke-moke na mangomba na biso nyonso, bisika nyonso. Bótala naino, na lolenge ya makambo ya mikolo oyo. “Mobange mwasi ya ndumba ná bana ya basi”, ya Emoniseli 17, azali kopesa na bato “babóla, bakufi miso, bato na bolozizi” malakisi na ye ya likindo, oyo ekeseni na Liloba na Nzambe. “Pe bakutaki kati na ye milimo ya baombo, ya mibali ná basi ya—ya bipai na bipai.” Esika ya kobenda bato . . .

176 Klisto atátolaka Liloba na Ye, yango nde ebendaka bato. Abendaka bato ya mangomba te, baoyo babendamaka na badenomination minene, misala minene, makambo ya minene oyo ezali kosalema ná biloko ya kitoko. Kasi Liloba na Nzambe ebendaka Mwasi na libala ya Klisto.

177 Sikawa bótala. Ezali malamumu mpenza, ko—komona ete—ete lingomba ezali koluka kobenda bokebi ya bato na nzela na bantzambala kitoko pe ba—korále balati kitoko, ná basi bakatá suki ná bilongi bapákólá—pákólá. Pe bakanisaka . . . Bayembaka lokola Banje. Bakósaka lokola zabololo, babimaka butu mobimba, kokende bisika ya mabina, kokanisa ete ezali na yango eloko te. Pe yango nde bakanisaka: “Ezali n’ango mabe te. Ezali kitoko.” Kasi, bomoni, ezali lokuta, bamisaleli yango. Wana ezali Liloba na Nzambe te.

178 Na ntango wana, Mwasi na libala ya solo azali kobenda bokebi ya Nzambe, na kotósáká Liloba na Ye. Sikawa bótala. Sikawa tika ete biso tótala Klisto.

179 Okoloba: “Ee, sikawa, zela mwa miniti, bongo kitoko oyo ozali kolobela, yango ezali nini?”

¹⁸⁰ Biblia elobi, na Yisaya 53:2, ete ntango Yesu ayaki, “Azalaki na kitoko te ete tótalela Ye.” Ezali solo? [Losambo balobi: “Amen.”—N.D.E.] Kitoko moko te. Soki Áyaka na kitoko ya mokili, lokola Satana lelo, bato mingi balingaki kolanda Ye pe koyamba Ye, ndenge basalaka na lingomba lelo. Balingaki kondima Ye, koyamba Ye, ndenge basalaka Satana lelo. Na ntembe te, balingaki kosala bongo. Kasi, Ayaki na kitoko ya lolenge wana te, kasi Ayaka ntango nyonso na kitoko oyo ya ezaleli. Ezali yango, Klisto azalaki Mobali oyo ya kitoko, mbinga, makasi pe engambe te. Nzambe aponaka bato ya ndenge wana te.

¹⁸¹ Nakanisi lisusu mokolo moko, mosakoli moko akendeki ko—kopona mokonzi, kokómisa mwana moko ya Yisai mokonzi, mpo na kozua esika ya mokonzi mosusu, Saulo. Na bongo, Yisai abengisaki mwana na ye ya mobali, ya kitoko, monene pe mbinga. Alobaki: “Motóle ekobonga na motó na ye.”

¹⁸² Mosakoli abélémaki mpo na kosopa mafuta likolo na ye. Alobaki: “Nzambe aboyi ye.” Pe Aboyaki moko na moko na bango, kino akómaki epai na mwa moko ná loposo motane, mapeka ekwéyá. Asopaki mafuta likolo na ye, pe alobaki: “Nzambe aponi ye.” Bomoni? Biso toponaka na kotala na miso. Nzambe aponaka na ezaleli.

¹⁸³ Ezaleli, ata moto moko te azalaki na ezaleli lokola ya Yesu Klisto. Soki ezali kati na yo, ekotalisa Ye. Tomoni ete ezali solo. Ezali kitoko na Ye ya mokili te nde ebendaka Mwasi na Ye ya libala. Ezali ezaleli na Ye, ezaleli ya Lingomba, nde Yesu alukaka; esika ya ba-ndako minene te, esika ya bibongiseli minene te, esika ya bandimi mingi te. Alakaki kokutana esika bato mibale to misato basangani. Ya solo. Esika wana nde mondimi ya solo atongaka elikia na ye, ezali likolo ya Liloba na Nzambe oyo ezali kotatolama kati na Solo, ezali bongo. Bópona kokokana na Liloba na Ye, na etónga oyo elingaka mokili te. Bango bayinaka yango.

¹⁸⁴ Ezokamwisa te ndenge akabwáni na Ye, mpo azangaki emoniseli na Ye, pe azali na yango te. Azali komitungisa mpo na ye te, lolenge ye abikaka pe asalaka, pe biloko ya mokili boni azali na yango.

¹⁸⁵ Azali kokoluka nde ezaleli na ye mwasi, ezaleli ya Klisto. Sikawa, bózela mwa moke sikawa. Ezali bongo. Aponaka Mwasi na libala mpo na kotálisa polele ezaleli na Ye, epai ya oyo mangomba ya mikolo oyo, ya lelo, bazali mpenza koleka pembeni ya manaka na Ye—na Ye, na ba-milió na kilometre, mpo bandimaka te ete *Oyo* ezali Solo. Na bongo, ekoki kosalema ndenge nini? Sikawa, Azali kozela mokolo oyo Mwasi na libala wana akobongisama, Baebele 13:8, lokola Ezalaki mpenza, lokola Ye azalaki. Asengeli kozala mosuni na Ye moko, mikuwa moko, Molimo moko, makambo nyonso ndenge moko,

kotongama ndenge moko mpenza, pe na ntango wana, bango mibale bakomi moko. Kino lingomba ékóma bongo, boye bakomi eloko moko te. Ezaleli ya Ye, Liloba, mpo na eleko oyo, esengeli kopesa lolenge. Asengeli kopesama lolenge, kokóma lokola Ye.

¹⁸⁶ Sikawa, mpo na kosilisa, nalingi koloba ntina oyo nalobi makambo oyo, pe nako—nakosilisa. Mokolo mosusu na butu, pene na ngonga ya misato ya ntongo, nalamukaki.

¹⁸⁷ Nasengi na moto nyonso kati na bino, ete áyanola na likambo oyo. Nasilá koyebisa bino likambo na Nkombo na Nkolo kozanga ézala solo? Ezalaka ntango nyonso solo. [Losambo balobi: “Amen.”—N.D.E.] Na bosembo ya motema na ngai, Nzambe ayebi ete ezali solo. Na makambo nkóto na nkóto oyo esilá kolobama, ezali na moto moko te, esika moko te na mokili, oyo akoloba ete Ye asilá kozanga kokokisa liloba moko na yango. Ekokisamaka ntango nyonso malamumu mpenza.

¹⁸⁸ Ata ntango nazalaki na Phoenix, mokolo mosusu wana, to esili koleka pene na mobu moko, pe nayebisaki bino mpo na Liteya wana ya—ya *Mesie, Tokómi Ntango Nini?* Pe nayebisaki bino: “Banje nsambo bakokutana kuna”, pe ekozala kofungwama ya Bilembo oyo, pe nyonso wana. Pe kuna, ma—magazine *Life* ekomáki likambo yango, Móto monene oyo ezalaki komata likolo na mipewe, na mosánda ya kilometre ntuku minei na mwambe, pe na monene ya kilometre ntuku minei na misato. Balobaki ete bakokaki kososola te soki ezalaki nini; bayebi yango naino te. Pe ezali na bato bafandi awa, na ndako oyo, na mpokwa oyo, baoyo bazalaki kuna elongo na ngai ntango yango esalemaki, ekokanaki mpenza na oyo Elobamaki. Ayebisaki ngai makambo oyo esengelaki kosalema, pe esalemaki mpenza ndenge wana. Ndenge moko na moko na Bilembo yango efungwamaki, pe emonisaki mabombami oyo ebombamaki na bileko ya ba-reformateur pe bongo na bongo, na kobonga be nyonso.

¹⁸⁹ Ndenge, kuna likolo na ngomba, bato, misato to minei na bango bazali awa sika-sikawa, iyo, koleka ata wana. Ezalaki ngai komata ngomba, Molimo Mosantu alobaki: “Lokóta libanga wana.” Tozalaki na bokila. Alobaki: “Bwáka yango na likolo, pe lobá: ‘YANGO ELOBI NKOLO.’” Nasalaki yango. Mwa mopepe na lolenge ya mulongósi ekitaki longwa na yango. Nalobaki: “Kati na ngonga ntuku mibale na minei, bokomona loboko ya Nzambe.” Bato yango bazali awa na ngonga oyo sikawa.

¹⁹⁰ Mokolo elandaki, pene na ngonga ya zomi ya ntongo, natelemaki wana, nalobaki: “Milengela. Kende kobombama kuna na nse ya motuka,” azali mobundi-etumba-ya-kala. Nalobaki: “Likambo moko elingi kosalema.” Likolo ezalaki polele, kuna likolo ya canyon moko monene. Ekumbaki ya Móto ekitaki longwa na Likolo, Esalaki makelele makasi, Ebetaki bitutu ya ngomba, ndenge wana. Na—natelemaki na nse na

Yango. Nalongolaki ekoti na ngai, nasimbaki motó. Yango ekitaki pene na centimetre ntuku libwa to mokama na ntuku mibale likolo na ngai, pe etimolaki libulu zonga-zonga na etutu yango, ndenge wana, pe ebétaki lokito. Ezongaki na mipepe, Ebalukaki lisusu, pe Ekitaki, mbala misato, Ekataki kutu basóngé ya ba-nzete ya mike, na ntáká ya métre mokama na ntuku mwambe na misato. Boyoki bango koloba: “Amen”? Bazalaki kuna ntango esalemaki, bomoni, pe ebétaki lokito mbala misato.

¹⁹¹ Ntango babimaki na nse ya mituka pe nyonso wana, bazongelaki ngai, balobaki: “Soki ebétaka yo, ata elembo ya mafuta ya nzoto elingaki kotikala te.”

¹⁹² Nalobaki: “Ezalaki—Ezalaki Ye. Azalaki kosolola na ngai.” Nzambe alobaka na nzela ya ekumbaki. Bomoni? Pe Likonzi na Móto oyo bomonaka na fotó ezalaki wana.

Pe ntango Emataki na likolo, balobaki: “Ezali nini?”

Nalobaki: “Kosambisama ezali kobeta Ngambo ya Westi.”

¹⁹³ Mikolo mibale sima na yango, etikalaki moke Alaska ézinda. Bomoni? Ebetaki mbala moko kuna, lokito ya liboso.

¹⁹⁴ Ezali ete, osengeli kosala eloko moko lokola elembo, mpo na kotalisa yango. Ndakisa, moto moko atiaki mungwa na mbeki, abwakaki yango na mai, pe alobaki: “YANGO ELOBI NKOLO, tika ete mai ya malamú ézala.” Ndakisa mosusu, Yesu azuaki mai, asopaki yango na mbeki, pe—pe akómisaki yango vinio.

¹⁹⁵ Osengeli kosala eloko moko lokola elembo, mpo na kotalisa yango. Nde eloko oyo yango ezalaki, eloko oyo emataki likolo na mopepe pe ekitaki. Yango nde ebandisaki mwa ekumbaki wana. Kati na ngonga ntuku mibale na minei, Yango eningisaki ngomba yango kino etímolaki zonga-zonga.

¹⁹⁶ Rev. Misie Blair afandi awa, nazali kotala ye sikawa, ye azalaki kuna pe alokotaki mwa biteni na yango, pe bongo na bongo. Terry Sothmann ye oyo, ná bango, bazali awa, ná Billy Paul. Ná bandeko, mingi na baoyo mosusu bazali awa, baoyo bazalaki mpenza kuna mpo na komona yango kosalema, ntango Epasolaki yango biteni.

¹⁹⁷ Ezali lisapo te. Ezali solo. Esalemaki kuna na eleko ya Biblia te. Ezali sikawa nde. Bomoni? [Losambo balobi: “Amen.”—N.D.E.] Nzambe yango moko oyo alakisaka ngai ntango nyonso makambo yango, pe yango ekokisamaka mpenza ndenge etalisamaka. Ezángá kokokisama ata mokolo moko te. Sikawa, nazali kokumisa nde Ye.

¹⁹⁸ Eleki mwa ba-mpóso, nazalaki kati na emononeli. Natelemaki e—esika moko ya likolo, pe nasengelaki komona etaliseli ya liboso ya Lingomba. Pe namonaki, kouta na... Natelemaki mingi ndenge *oyo* boye, nazalaki kotala ngambo ya Westi. Pe, kouta na ngámbo *oyo*, ezalaki na etóngá moko kitoko ya basi, balataki kitoko mpenza, ná suki milai bazóngisa yango

kitoko na sima, bilamba ya maboko milai, ná bajúpe milai ya malamumu. Bango nyonso bazalaki kotambola na mizíki ya defilé, lokola “Tokende liboso, basodá-Baklisto, kotambola lokola na etumba, ná ekulusu ya Yesu kokende liboso”. Ntango bazalaki koleka, natelemaki, pe Eloko moko ezalaki wana, Molimo moko, ezalaki Nzambe, elobaki: “Mwasi na libala Ye wana.” Natalaki, pe motema na ngai esepelaki. Pe Abalukaki na ngámbo *oyo*, pe alekaki sima na ngai.

¹⁹⁹ Sima na mwa ntango, ntango azongaki na ngámbo *oyo*, Elobaki: “Sikawa lingomba ya mikolo oyo ekoya koleka liboso.” Pe lingomba ya Azia eyaki. Namóná naino etónge ya mbindo ya boye te.

²⁰⁰ Mangomba mosusu eyaki, ya bikólo ndenge na ndenge. Bazalaki komonana somo mpenza.

²⁰¹ Pe na—nazali koloba likambo oyo mpo natindami koloba solo, liboso na Nzambe. Ntango Alobaki: “Lingomba ya Amerika ezali koya sikawa, mpo na koleka liboso,” Soki nasilá komona etónge ya bazabolo, ezalaki yango. Basi yango bazalaki mpenza bolumbu, ná eloko moko ya kala ya lángi ya gris, lokola lángi ya loposo ya nzoku. Basimbaki yango liboso na bango, kasi eteni ya likolo ezalaki te. Pe bazalaki kobina na lolenge wana, ma—mabina oyo, bilenge oyo babinaka awa, twist ná soko nini wana, pe lolenge ya mizíki yango ezalaki kobeta. Pe ntango namonaki Miss U.S.A. koya, nalingaki kokweya sénza.

²⁰² Sikawa, oyo ezali YANGO ELOBI NKOLO. Soki bondimaka ete nazali mosali na Ye, bóndimela ngai sikawa. Nakolinga koloba likambo ya bongo te ata ndenge nini. Mokili mobimba ezali ata na mbongo ekoká te, ya kopesa ngai mpo élobisa ngai yango, soki yango ezalaki solo te.

²⁰³ Ntango alekaki, wana ezalaki eloko ya mbindo mpenza koleka, oyo ngai natikálá komona. Nakanisaki: “Nzambe, makasi nyonso oyo batei ná biso bandeko tosali mpo na kopesa Yo Mwasi na libala, pe yango nde nyonso ya malamumu koleka, oyo tokoki kosala.” Azalaki koningisa nzoto, wana asimbi *oyo* liboso na ye, lokola moko na ba-júpe oyo ya babíni zebola, asimbaki yango liboso na biteni ya nzoto na ye, eteni ya nzoto na ye ya nse, ndenge *oyo*, wana azali kobina pe koningisa nzoto lokola bilenge oyo basalaka awa na . . . na ba-emission ya bosoto oyo bazalaka na yango, ya koningisa nzoto. Wana ezalaki Miss Boklisto ya Amerika.

²⁰⁴ Na bosembo ya motema, ná lisungi ya Nzambe, yango nde likambo oyo ezali komonana na miso na Ye. Na—na . . . nalingaki . . . nakokaki kokweya sénza. Namilobelaki: “Komeka nyonso, mateya nyonso, pe koluka kondimisa nyonso?” Bango nyonso bakátá suki, pe bazalaki koningisa nzoto pe kosala bisálélá, wana basimbi *oyo* liboso na bango. Bayaki pene na esika natelemaki elongo ná Ekelamu ya kokamwisa oyo. Nakokaki

komona Ye te. Nakokaki koyoka Ye kosolola na ngai; Azalaki mpenza pembeni na ngai. Kasi ntango babalukaki na ngámbo *oyo*, basimbaki *oyo*. Bazalaki koningisa nzoto, koseka pe kosala bisálélá, bazalaki kosala bongo, basimbaki *oyo* liboso na bango.

²⁰⁵ Sikawa, wana natelemaki wana, Liboso na Ye, pe mosali na Ye. “Na nyonso oyo nasali, yango nde nyonso ya malamumu mpenza oyo nakokaki kosala?” Nakanisaki: “Nzambe, esungi ngai na nini? Esungi na nini? Kolela nyonso, kobondela, koluka kondimisa, pe bilembo minene, ná bikamwiseli ná bikamwa nyonso oyo Otalisaki. Pe ngai nazalaki wana, kozonga na ndako pe kolela, sima na koteya bango pe nyonso wana, kasi esungi ngai na nini? Na sima, nasengeli kopesa Yo eloko ya boye, lokola Mwasi na libala?”

²⁰⁶ Pe wana ezalaki ngai wana, kotala, alekaki na ye koleka. Bokanisa naino mokongo na ye, alataki eloko moko te, asimbaki *oyo* wana liboso na ye ntango azalaki koleka pe kodendanda, ndenge wana, na mizíki ya twist, kobwaka maboko ná makolo na ye ndenge wana. Pe, ye, oh, ezalaki bosoto, ndenge azalaki kosala bisálélá, kobalola-balola nzoto na ye ndenge wana. Sikawa ngai. . .

²⁰⁷ Okoloba: “Elingi koloba nini, Ndeko Branham?” Nayebi te. Nazoyebisa bino kaka likambo oyo ngai namonaki.

²⁰⁸ Ntango alekaki ndenge wana, natalaki ye. Oh, namiyokaki mpenza kokweya sénza. Nabalolaki elongi. Nakanisaki: “Nzambe, nakweisami. Nazali—nazali lisusu na ntina ya komeka te, sikawa. Ekozala malamumu kotika.”

²⁰⁹ Mme. Carl Williams, soki ozali awa, mpo na ndoto oyo oyebisaki ngai, eleki mwa ntango, olotaki yango mokolo wana na butu, likambo oyo ezalaki kotungisa yo, yango wana. Yenda elongolami na maboko na ngai.

²¹⁰ Na bongo, namilobelaki: “Ekozala malamumu mpo na ngai ko—kobosana yango kaka.” Esilaki mpo na ngai.

²¹¹ Na sima, mbala moko, nayokaki Yango koya lisusu. Pe na ngámbo *oyo*, Mwasi na libala yango moko oyo abalukaki ngámbo *oyo* azalaki koya. Bilenge basi yango bayaki lisusu, pe moko moko na bango alataki molato ya ekólo oyo autaki, ndakisa Suisse, Allemagne, pe bongo na bongo, moko na moko alataki lolenge ya molato wana, bango nyonso ba-suki ya milai, ndenge moko mpenza lokola baoyo ya liboso. Pe tala bazalaki koya, kotambola. “Tokei liboso, basodá-Baklisto, tótambola lokola na etumba.” Pe ntango bango nyonso balekaki na lifilí ya liboso, esika totelemaki, mbala moko, miso nyonso etalaki na ngambo wana. Na sima, babalolaki mitó pe bakobaki kotambola.

²¹² Pe bobele ntango babandaki komata na likolo, oyo mosusu amataki likolo na ngomba pe akitaki, *boye*.

213 Bango babandaki kotambola pe komata mbala moko na likolo. Pe ntango bazalaki kotambola, namonaki bilenge basi mibale to misato na sima, lokola bilenge basi ya bikólo mosusu, lokola Suède, Suisse to esika moko boye. Babandaki kotala zingazinga, pe kozua. . . Nalobaki: “Bósala bongo te! Bóbima libanda na molongo wana te!” Pe wana egangaki ngai bongo, kati na emononeli, nalamukaki, nazalaki wana ná loboko na ngai kosembwama *boye*. Namilobelaki: “Ee. . .”

214 Yango nde ntina oyo nalobaki likambo oyo nazali na yango na mpokwa oyo. Nalingi kotuna bino motuna moko. Ntango ekómi mosika koleka ndenge tozokanisa? Ekoki kosalema ete Asili kobengama pe koponama, kotiyama elembo ya libela? Mosusu ya kobakisama akozala te, boyebi. Yango nde ekoki kosalema? Oh, iyo. Oh, iyo.

215 Bókanisa lisusu likambo oyo nalobaki mokolo mosusu wana, na ntango ya bilei-ya-ntongo. Ntango mputulú ya fololo ekutanaka, ya mibali ná ya basi, mimboto milió ebimaka, bamáki milió ebimaka. Kasi bobele moko kati na yango etikalaka na bomoi, nzokande, nyonso ezalaka ndenge moko: moko kati na milió. Yango nyonso, máki yango moko pe lolenge yango moko ya momboto. Bobele moko nde etikalaka na bomoi. Bamosusu nyonso ekufaka.

216 Moto moko te ayebi líki oyo ekoméli, pe, oh, likambo yango ezali nini. Nzambe nde asengeli kozua mokáno yango, soki ekozala mwana mobali to mwana mwasi, pembe makasi to mwa moindo, to ndenge nini akozala. Nzambe nde azuaka mokáno yango. Ezali oyo ekómi liboso te, kasi ya liboso oyo Nzambe akáni. Ntango mosusu moko akómi *awa*, pe mosusu. . . Soki bosilá komona yango, na kati ya éprouvette, komona yango ndenge ekutanaka. Ngai nasilá komona yango. Nzambe asengeli kozua mokáno yango. Moko, yango nyonso ndenge moko, kasi ezali likambo ya koponama. Kobotama na nzoto, ezali likambo ya koponama. Nzambe aponaka moko kati na milió.

217 Ntango Yisraele ebimaki na Ezipito mpo na kokende na mboka ya elaka, bazalaki pene na bato milió mibale. Bango nyonso bazalaki na nse ya mbeka ya mwana-mpate yango moko, soki te, balingaki kobika te. Bango nyonso bayokaki Mose, mosakoli. Bango nyonso babatisamaki na ye, kati na Mai-na-Mbu Motane. Bango nyonso babinaki, basi elongo ná Miryam, kopumbwa-pumbwa, (ntango) pembeni na libóngo, ntango Nzambe abomaki monguna. Bango nyonso bazalaki elongo na Mose, pe bayokaki ye koyemba na Molimo. Na esobe, bango nyonso baliaki máná oyo ezalaki kokweya longwa na Likolo. Máná ya sika, butu nyonso, ezali elilingi ya Nsango, bango nyonso baliaki yango. Kasi, kati na milió mibale wana, bato boni bakótaki? Mibale. Moko kati na milió.

218 Baklisto bazali pene na milió nkama mitano na mokili mobimba na mpokwa oyo, soki otángi ba-Katoliko pe bango nyonso. Milió nkama mitano ya bandimi ya maloba na mokili mobimba. Soki Konetolama esalemi na mpokwa oyo, elingi koloba...soki esengeli mpenza kozua moko kati na milió. Nalobi te ete ezali bongo. Kasi soki ezalaki bongo, na ngonga ntuku mibale na minei oyo ezali kolanda, bato nkama mitano bakolímwa. Bokoyoka nsango na yango ata moke te. Ata bongo, bato mingi balímwaka, ekoki pe koyebana na yango te.

219 Boye, moninga, yango ekokaki kokómela biso lokola esalemaki ntango Yoane Mobatisi ayaki. Ata bayekoli balobaki: “Mpo na nini Makomi elobaki, mpo na nini ba—bantóma to basakoli balobaki, mpo na nini elobamaki ete Eliya asengeli koya liboso mpo na kobongisa makambo nyonso?”

220 Alobaki: “Nalobi na bino ete Eliya asilaki koya, kasi boyebaki yango te.”

221 Moko na mikolo oyo, tokoki kotikala tofandi awa koloba: “Bongo Konetolama oyo esengeli kosalema liboso na minyoko?”

“Esílá kosalema, pe boyebaki yango te.”

222 Nzoto mobimba, etiami elembo na kati, esengeli bobele kobátela Yango na molongó. Nalobi te ete ezali bongo. Nazolikya ete ezali bongo te. Kasi, moninga, ntango etiki. . .

223 Na mpokwa oyo, soki toyoki na mitema na biso, ete tosengeli kobongisa bomoi na biso, ná makambo oyo tosalaki, bótika nápesa bino toli, lokola ndeko na bino motei. Nakoloba yango na eteyelo, mpo na mbala ya liboso. Ata bongo, na mpokwa oyo, nalobeli likambo *Oyo* na molai mpenza, koleka likambo nyonso, na ntango nyonso, liboso na bato nyonso, mpo epesameli ngai bonsomi mingi mpenza na mayangani oyo. Soki bondimaka ete nazali mosakoli ya Nzambe, boyóka oyo naye bisi bino. Soki ozali na mwa mposa moke ya mabe na motema na yo, kende epai na Nzambe sikasikawa. Sala yango.

224 Mibali, bótelema mwa moke. Bótala bi—bindimeli na bino, oyo bosalelaka. Bótala na mangomba na bino. Yango elongobani mpenza na Liloba na Nzambe? Bokokisi makambo nyonso oyo esengami? Okoloba: “Nazali moto malamú.” Nikodeme pe azalaki bongo, ná baoyo mosusu nyonso. Ba—bazalaki bato malamú mpenza. Bomoni? Etali Yango na eloko moko te.

225 Pe, bino basi, nalingi ete bótala na talatála, pe bótala eloko nini Nzambe asengi na mwasi. Sikawa, bótala na talatála ya Nzambe, na talatála ya lingomba na bino te, na talatála ya Nzambe; pe bótala soki, na bomoi na bino, bokoki mpenza kozala Mwasi-na-libala ya molimo ya Yesu Klisto.

226 Batei, bókanisa ndenge moko. Bozuaka nzela ya mokuse *awa*, mpo na koboya kotungisa makanisi ya moto moko kuna? Bokoki kosala *oyo* soki ezalaki te. . . mpo bakobengana yo na

lingomba? Soki ozali komiyoka ndenge wana, ndeko na ngai molingami, tika nákebisa yo, na Nkombo na Yesu Klisto, kimá yango sika-sikawa.

227 Pe, madame, soki okoki kozala na mosanda ya kozala na lolenge ya Moklisto te, Moklisto ya maloba te; kasi na motema na yo, bomoi na yo ékokana mpenza na oyo esengami awa na mokanda ya libala ya Nzambe.

228 Pe, mondimi ya lingomba, soki lingomba na bino ezali bongo te, ete ekoki na mosanda ya kozala na lolenge Nzambe asengi na Liloba na Ye te, bimá na yango pe kota kati na Klisto.

229 Wana ezali likebisi ya polele. Toyebi te ntango nini, boyebi pe te ntango nini, ete engumba oyo mokolo moko, ekozinda awa na nse ya mai-na-mbu oyo.

230 “Oh, Kapernaume,” Yesu alobaki, “yo oyo ominetoli kino na likolo, okokitisama kino na ewelo. Mpamba te, soki misala na nguya oyo esalemaká na Sodoma pe Gomora, elingaki kozala kino lelo.” Pe Sodoma ná Gomora ezali na nse ya Máí na Monana. Pe Kapernaume ezali na nse na mai-ya-mbu.

231 Yo engumba oyo omibengi engumba ya Banje, oyo ominetoli kino na likolo, pe ozali kotinda makambo ya bosoto, ya mbindo ya ndenge na ndenge, ba-mode pe makambo mosusu, kino ata bikólo ya bapaya ekómi koya awa mpo na kozua mbindo na biso pe kotinda yango bisika mosika, na ba-losambo na yo ya kitoko, ná ba-ngonga pe biloko mosusu, ndenge bosalaka. Kobosana te, mokolo moko okozala na nse na mai-ya-mbu, mabelé etondi na madusú lokola zála monene ya banzóí ezali na nse na yo sasaipei. Nkanda na Nzambe ezali konguluma mpenza likolo na yo. Akokoba kobatela mwa zelo etikali na yango mikolo boni? Na ntango oyo, mai-na-mbu yango kuna, na bozindo ya metre nkóto na nkama motoba, ekoselumwa na kati kuna, kino na Salton Sea. Ekozala mabe mpenza, koleka mokolo ya suka ya Pompéi. Bóngola motema, Los Angeles.

232 Bóbongola mitema, bino nyonso, pe bóbongwana epai na Nzambe. Ntango ya nkanda na Ye ezali likolo na mokili. Bókima, wana ntango ya kokima ezali naino, pe bókota kati na Klisto.

Tobondela.

233 Nzambe molingami, wana molimo na ngai ezali kolenga, motema na ngai ezali kotangisa mpisoli ya likebisi. E Nzambe, sala ete mibali pe basi bakanisa te ete nalobi yango lokola liseki, pe bandimi ya losambo bakanisa te ete ezali makanisi na ngai to eloko moko mpo na kotelemela bango. Tika bámona, Nkolo, ete ezali na bolingo nde.

234 Ozali motatoli na ngai, Nzambe na-Nguya-Nyonso, ete natamboli na libóngo oyo komata kokita, mobu sima na mobu, kosakoláká Liloba na Yo. Zala motatoli na ngai, E Nzambe, soki esalemi na mpokwa oyo, nasili koyebisa bango Solo. Yo oyebi ete

emononeli oyo ya Mwasi na libala ezali Solo. Natiaki Nkombo na Yo na kati, Nkolo, pe nalobaki ete ezali YANGO ELOBI NKOLO. Pe nazali komiyoka, Nkolo, ete nayebi malamumu likambo oyo nazali kosala.

²³⁵ Na bongo, nabondeli Yo, Nkolo, na Nkombo na Yesu, tika ete bato báminingisa, na mpokwa oyo, pe bákima nkanda oyo ezali koya, mpamba te Ikabod ekomami likolo na bikuke pe likolo na bikólo. Elembo ya moindo etiami likolo na yango. Molimo ya Nzambe eyoki mawa pe ekei, bamekami na kilo pe bakoki te. Féti ya Mokonzi Nebukadanesala esalemi lisusu, ná ba-féti ya milángwa pe basi balati bilamba ndambo, bazali komibenga Baklisto.

²³⁶ E Nzambe ya Lola, yókela mokili ya masumu pe libota ya masumu mawa, Nkolo, ndenge tozali na mpokwa oyo. Nzambe, nazali komeka kotelema na kati-kati, mpo na kosenga mawa ya Nzambe, ete Óloba na ebelé ya bato oyo, na mpokwa oyo, pe kobenga Mwasi na Yo ya libala na bokebi, Nkolo, mpo atambola na elembo ya endimeli moko te, kasi na lokito ya Nsango malamumu ya Nkolo Yesu Klisto. Kokisa yango, E Nzambe. Tika éyéhana, na mpokwa oyo, ete Ozali Nzambe, pe Liloba na Yo ezali Solo. Wana, na limemia nyonso, totelemi liboso na bato oyo, mpo na kobenga bango na botósi ya Liloba na Yo.

²³⁷ Na Nkombo na Yesu Klisto, nabondeli mpo na bango, Nkolo. Basili komona Yo, na ntembe ata moke te, koleka kati na etonga na bango pe koyebisa bango makambo oyo ezali na mitema na bango. Pe Oyebi, Nkolo, makambo oyo ezali kosalema sikasikawa. Oyebi ete ezali Solo, E Nzambe. Pe nabondeli Yo, na Nkombo na Yesu, tika ete Molimo Mosantu álobela lisusu, Nkolo, pe ábenda kati na eyanganelo oyo, Nkolo, baoyo bankombo na bango ekomámá na Buku ya Bomoi ya Mwana-mpate. Kokisa yango, E Nzambe. Nabondeli na motema na ngai mobimba.

²³⁸ Bato oyo, na ndenge ya mokili, Nkolo, bakoki kokabela ngai mbongo nyonso batikali na yango, mpo na kosunga Nsango yango. Bakoki kosala nyonso bakoki kosala. Kasi, E Nzambe, soki ekómi likambo ya kolongobana ná Yango, pe kokota kati na Yango, nabondeli, e Nzambe, ete mpokwa oyo ézala ntango oyo Okofuta bango pe Okosopa Molimo Mosantu na Yo likolo na likita oyo. Ézala ntango ya koseka-seka to ya kopumbwa-pumbwa te, kasi ya kolela, kogánga pe kobongola motema, kokanga maseke ya etumbelo, wana tozali komona kosambisama konguluma na nse na biso, na mpokwa oyo. Kokisa yango, Nzambe. Nabondeli na bosembo nyonso, na Nkombo na Yesu Klisto.

²³⁹ Ndeko na ngai mobali pe ndeko mwasi, na—nayebi lisusu likambo ya koloba te, soki nazui ngolu na miso na bino, na nguya na Nzambe, soki bondimaka ete nazali mosakoli na Ye. Oyo nde mbala ya liboso mpo na ngai koloba yango liboso na bato

nyonso. Kasi nayoki likebisi moko ya ndenge mosusu. Nazalaka na momesano ya boye te. Boyebi ete nazalaka bongo te. Nasalaka makambo ya boye te. Nazalaki koyoka kiló mpo na koteya Liteya oyo pe koloba makambo oyo. Nakendeki pembeni-pembeni pe nyonso wana, mpo na kosala yango te. Kasi Elobami, pe Ekozala na Mokolo ya Kosambisama, lokola litatoli, ete nalobaki Solo. Ezali YANGO ELOBI NKOLO NZAMBE! . . . ? . . .

²⁴⁰ Oh, Pantekote, bókima mpo na bomoi na bino. Bókima mbangu kino na maseke ya etumbelo pe bólela, liboso ntango ésila, mpo ntango moko ekoya, oyo bokolela kasi ekosunga ata moke te. Mpamba te Esau alukaki kozua lisusu esika na ye ya bokulutu, kasi azuaki yango te. Nazongisi yo, oh, Californie. Oh, likita ya ba-Homme d’Affaire Du Plein Evangile, oyo nalingaka, oyo natikaki pe natingamaki na bino, na motema na ngai mobimba, nazongisi bino na maboko ya Yesu Klisto, na mpokwa oyo. Bókima mbangu epai na Ye! Bótika te ete zabolo ásilisa mpiko na bino na Likambo oyo. Bókangama na Yango kino moko na moko na bino átondisama na Molimo Mosantu, pe ekosala ete bókoka koya na Liloba oyo, pe bino basi bóbongisa bomoi na bino, pe bino mibali bóbongisa bomoi na bino. Soki olobi ete ozali na Molimo Mosantu, pe oboyi kolóngobana na Liloba, molimo mosusu nde ezali kati na yo. Molimo ya Nzambe ezalaka likolo ya Liloba na Ye, Liloba ya Masiya, oyo epakólómi. Mwasi na libala asengeli kozala Masiya ya moke, Liloba oyo epakólámi.

²⁴¹ Tótelema, na Nkombo na Nkolo Yesu Klisto. Soki bokotikaláká koyoka lisusu mongongo na ngai te. . . . Kasi, soki Nzambe alingi, sima na mwa ba-ngonga, nazali kokende na Afrika. Ntango mosusu nakozonga lisusu te. Nayebi te. Kasi nayebisi bino, na motema na ngai mobimba, nayebisi bino Solo. Nabombi koyebisa bino te nyonso oyo Nzambe ayebisaki ngai ete náloba. Pe nasili koloba Yango na Nkombo na Nkolo.

²⁴² Ezali ntango ya motuya monene. Nayebi te ndenge ya koloba yango. Namekaki kotika eteyelo mbala misato to minei, kasi nakoki te. Oyo ezali ngonga ya motuya monene. Bóbosana yango ata moke te. Oyo ezali ntango oyo Nzambe azali, ntango mosusu, kobélela mpo na mbala na Ye ya suka. Nayebi te. Mokolo moko, Akobélela mpo na mbala ya suka. Ntango nini? Nayebi te. Kasi nayebisi bino, kokokana na emononeli yango, emonani lokola kobongisama ya Mwasi na libala yango ekómi na suka.

²⁴³ Bótala ndenge mangomba ya bibongiseli ezali kokota. Ntango mongondo oyo alalaki ayaki koluka Mafuta, azuaki Yango te. Mwasi na libala akotaki. Konétolama esalemaki. “Wana bakendeki kosomba Mafuta, Mobali na libala ayaki.”

²⁴⁴ Olali mpongi? Lamuka noki, pe zua lisosoli. Pe tóbondela, moko na moko, lokola tolingi kokufa na miníti oyo, na Nkombo na Nkolo. Tika ete moko na moko ábondela na lolenge na ye moko.

²⁴⁵ Nzambe na-Nguya-nyonso, yókela biso mawa. Nkolo, yókela ngai mawa. Yókela biso nyonso mawa. Ata soki tosali nini, ntina na yango nini, soki tokweyisami na makambo oyo? Natelemi pe nasengi mawa, E Nzambe, liboso engumba monene oyo ézinda na nse ya mai-na-mbu pe kosambisama ya Nzambe ébeta libóngo oyo. Nabondeli, Nzambe, ete Óbenga Mwasi na Yo ya libala. Natiki bango na maboko na Yo sikawa, na Nkombo na Yesu Klisto. Amen.



KOPONA MWASI NA LIBALA LIN65-0429E
(The Choosing Of A Bride)

Liteya ya Ndeko William Marrion Branham oyo, eteyamaki liboso na Anglais na mokolo ya minei na mpokwa, mokolo mwa 29, sanza ya minei, na mobu 1965, mpo na Likita ya Convention International ya Dejene ya ba-Homme d’Affaire Du Plein Evangile na Hotel Biltmore, na Los Angeles, na Californie, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org